

ASO TOFI, 25 IUNI 2020

Na nofoia e le Fofoga Fetalai le Nofoa i le itula e 9:10 i le taeao.

Tatalo.

SUI FOFOGA FETALAI: Ou te faasilasila atu ua toe amatalia nei Taualumaga ma Galuega a le Fono Aoao Faitulafono.

E i ai le lagona i lenei taeao o le Maota ua lauiula ae poupou i toa, aua o lea ua afifio ma papaaao Taitai o le atunuua aua le latou galuega fai. Ou te tautala ai ma le migao ma le ava e faaaloalo, e faatalofa i le maleifua mai i faguga lelei, le paia maualuga o le Malo, le afio o lau Afio o lau Afioga i le Palemia, le Sui Palemia ma le mamalu o le Kapaneta i ona tulaga faalupe, malo le soifua.

Ou te faatalofa foi i le paia maualuga o sui usufono uma o le Palestene, malo folau. E afe foi se faamatalaga e faatalofa i le paia maualuga o Ofisa Sili o Pulega o Matagaluega a le Malo, faapea Faalapotopotoga Tumaoti, malo le usu, malo foi le onosai mai.

Ia, matou te ofo alofa ma faatalofa i le atunuua pele, o le atunuua tofi, o le atunuua mamala i lau tapuaiga Samoa. Ia, tapuai maia se i alo taitai o lou atunuua e saili manuia aua taeao ma e luā.

**TULAFONO TAU FAAOFI O LE FAATATAUINA O TUPE
FAAOPOOPO (NU.3) 2019/2020 & TULAFONO TAU FAAOFI O LE
FAATATAUINA O TUPE AUTU 2020/2021
– felafolafoaiga faaauau i luga o le faiatauga faalua**

SUI FOFOGA FETALAI: O le a faaauau pea felafolafoaiga i Tulafono Tau Faaofi. Ma e tolopo galuega a le Fono Aoao i le aso ananafi ua maea ona saunoa le Minisita mo Tiute ma Tupe Maua, faapea foi le Matagaluega o Leoleo, Falepuipui ma le Ola Toefuataina.

Ma o le avanoa lelei lenei ou te tapa ai lau Afioga i le Minisita o le Matagaluega o le Soifua Maloloina e tulai mai e talifuaitau i mataupu sa laga e sui usufono, lau Afioga i le Minisita.

Tofa Hon FAIMALOTOA KIKA IE MAIMA STOWERS (Minisita mo le Soifua Maloloina): Lau Afioga i le Fofoga Fetalai, faafetai mo le

avanoa. E ppiama le sui usufono e auai faatasi i talosaga molia e nonomanu ai i lo tatou Alii ma lo tatou Atua e tapuai faiva o Samoa i lenei aso, aemaise foi le Fonousu a le Palestine. E molimoli atu foi moomooga ma faamanuiaga i lau Afioga e tusa ai foi o lau faafoega o le Fonotaga i lenei taeao. O ou mama na.

E faafeiloai atu i le Afioga i le Taitai o le Maota i lau Afioga i le Palestina, lau Afioga i le Sui Palestina ma le Aiga Kapaneta. Ia, a outou Afioga i Minisita Lagolago i lena itu o le Maota, e faatalofa ma faafeiloai aloaia atu i a outou Afioga i Taitaifono o Komiti Faa-Palestine, aemaise o sui usufono mamalu uma o le Fonousu a Samoa mai itumalo uma o si o tatou atunuu.

E le galo lava lau au faatalofa aloaia i la outou saofaiga o Ofisa Sili o Pulega o Matagaluega ma Faalapotopotoga Tumaoti o lo o limataumatau atu ia te outou lo tatou Malo e ala i la outou fautuaga, aemaise o le faatinoina o galuega ma auaunaga eseese o lo o manaomia aua le atinae o Samoa, aemaise o le tautuaina o nai o tatou tagata. Malo le galulue, faamalo le onosai, faafetai i lo outou tautua atunuu.

E faatalofa atu foi i lau Afioga i le Susuga i le Failautusi o le Maota faapea le aufaigaluega a le Maota Fono o lo o faapena ona tautuaina le mamalu o sui usufono i taimi uma e tauaofia ai le Palestine.

Ia, e faafeiloai ma ofo alofa atu foi i lenei itula i le faafogafoga tapuai mai a Samoa i ou tulaga faalupe, i lau Afioga i Le Ao Mamalu o le Malo ma lau Masiofo, lau Afioga i le Sui o le Fono a Sui Tofia ma le faletua. E faatalofa atu foi i le Faamasino Sili ma le Ofisa o Faamasinoga. Avea foi lenei avanoa e ofo alofa ma molimoli atu ai faamanuiaga i lau Afioga i le Faamasino Sili i lou valaauna, i lenei foi tofi maualuga o si o tatou atunuu. O ou mama na, aua e talitonu e le o se galuega faigofie.

E faatalofa faapitoa foi aemaise o le faafeiloai aloaia atu i le aufaigaluega totofi a le Atua i fatafaitaulaga e fia o lo o nonomanu ma moli talosaga aua se manuia o Samoa ma lana folaua i aso taitasi. Faafetai tele i la outou tapuaiga.

E le faagaloina le tapuaiga a tina ma tama matutua, aemaise foi o talosaga. Ou te faafetai ai i Tamaitai Monike, o taimi uma e fesootai ai, o lo o momoli mai pea le latou faamalo ma le faafetai i le Afioga i le Taitai, faapea foi tatou uma o Taitai o le atunuu mo le faafoeina o si o tatou Malo. Malo i a outou Afioga i Tamaitai Sa, faamalo le tatalo.

E faatalofa atu foi i le paia maualuga o Samoa o lo o faafogafoga mamao mai i so o se atunuu o lo o mafai ona oo atu i ai le malosi o nei faasalalauga, ae le gata i lea o nai o tatou aiga ma fanau, o uo ma e masani o lo o latou tulimatai mai ma tapuai mai i taualumaga o le Fonousu a Samoa.

Lau Afioga i le Fofoga Fetalai, o le tapuaiga a si ou itumalo pele o Gagaifomauga Nu.1 o le a faaiu i ai sau folasaga i se taimi mulimuli ane.

Ae o le a ou agai atu loa e faia se faamatalaga e tusa ai o galuega a lenei Matagaluega ma fuafuaga faataatitia, aemaise ai foi o sui usufono sa sausaunoa ma agai mai i le Matagaluega nei o le Soifua Maloloina.

Lau Afioga i le Fofoga Fetalai, e lagona lava le agaga faafetai ma le loto faagaeetia i le Atua ona o Lona alofa faamaoni ia Samoa aua ua ia faailoa ma faaauala mai e ala i le tatou faigamalo i lenei vaitau mafaufauga lelei, le lototetele, aemaise o Lana meaalofa o lo outou soifua ma so matou tatou ola ma le malosi tatou te faia ai le tele o faaiuga ma fuafuaga lelei ma talafeagai, mo le lumanai manuia o si o tatou atunuu pele o Samoa.

E pei foi ona malie i saunoaga a nisi o sui usufono mamalu o le Maota, o nei e faufau, poupou ma faavae ai fuafuaga lelei mo le manuia o Samoa mo a taeao.

O le toe tuufaatasiga o le Matagaluega o le Soifua Maloloina i le suaia mai lea i le tulaga sa i ai e pei ona lausilafia, o le NHS ma le MOH, toe tuufaatasia mai la i le mea ua i ai nei i lalo o le Matagaluega e tasi le Soifua Maloloina, na faatoa mafai ona faamautu ia Fepuari o le tausaga lea na tea nei 2019 ina ua uma ona faataatitia aiaiga e pei ona finagalo i ai lo tatou Malo, ia matuai faamautu ma faatauaina le ave o le faamuamua i le soifua maloloina lautele o le atunuu, le public health. E tofia lou nei tagata e avea ma Minisita o le Matagaluega, o lo o faufau ma poupopou tulaga taua ma le manaomia aemaise lava le faamamafa ua ave nei i tulaga uma tau le puipuiga.

E 4 masina o lou tofiga ae aliae mai loa le misela. O lau faafetai, o le alofa o le Atua ia Samoa, aua e fou le auivi, fou le faataatiaga o le Matagaluega, fou foi nisi o fesuiaiga ua faamasani i ai nisi o le aufaigaluega, ia toe atili e fou le Minisita ua tu i le foe. Ia, masalo o le a ou toe oo mai i le vaega lea i se taimi o i luma, leaga e fesootai tele le mea na tupu i le misela ma fuafuaga faataatitia i le vaai mamao a le Malo mo le agai i luma.

Ou te manatu e le atoa se 20 minute ou te tulai ai, peitai ane, e maualuga ia te au sausaunoaga a sui usufono mamalu, aua o le toatele lava o e uma na saunoa ma agai mai i le Matagaluega, o le molimoli mai o le faamalo ma le faafetai. Ia, o lena ou te muai momoli atu ai le agaga faafetai tele i sui usufono mamalu uma o le Maota sa sausaunoa ma faafetai mai ma faamalo mai. O lea faamalo e tusa ai o galuega ma auauanga eseese ua faatino ma faagasolo atu e le Matagaluega i tua i nuu ma afioaga, aemaise ai o taumafaiga eseese ma polokalame faalauiroa i aso uma, e le gata i le faaaogaina o leitio ma ualesi faasalalau i totonu o le atunuu, faapena i ala ata o lo o tuu atu ai faamatalaga ma tulaga uma e ao ona silafia mo le malupuipuia o si o tatou atunuu mai le faamai matautia o le Koviti-19, lea ua maliliu ai le faitau afe ma afe o le tele o atunuu o le lalolagi atoa ai ma le faitau miliona lea ua toeitiiti oo i le 10 miliona ua aafia ai, aemaise lava i atunuu tetele, ma atunuu e tele lo latou tamaoaiga, a o lea lava e oo mai i le taimi nei o lo o saogalemu pea Samoa i le alofa ma le agalelei o lo tatou Matai Sili i le Lagi.

Le tapuaiga a Samoa o lo o faafogafoga mai, e i ai le talitonuga e le tau faafetaia le auaunaga a le Malo e ala atu i le Matagaluega o le Soifua Maloloina, aua o galuega ma tiute ua totofi ai i tatou, o lo tatou lea valaauna, e ao ai ina ia o tatou faia ma le alofa aemaise o le faamaoni, ona faamanuia lea o le Atua aua e ati Lana silafaga i so o se mea tatou te faia. Afai o le a se matau, a o se silasila ma se tagatagai o si o tatou atunu i se tautua a o se auaunaga a le Malo e ala atu i lenei Matgaluega e pei ona ua molimoli mai e lo outou mamalu o sui usufono filifilia o itumalo eseese o si o tatou atunu, tatou ave lea e momoli ai le viiga ma le faafetai, a o se faaneetaga o lo tatou Matai Sili i le Lagi mo le malutia pea o Samoa i Lana tausiga ma Lana puipuiga alofa. Ma e i ai lava le agaga tatou faaauau pea, fai faaataasi le tatou tatalo ina ia alofa pea le Atua, faaauau Lona alofa ma Lona agalelei ina ia saogalemu pea Samoa mai lenei faamai matautia.

Lau Afioga i le Fofoga Fatalai, le mamalu o le Maota, aemaise o le faafogafoga tapuai mai a Samoa, e momoli atu foi le matou faafetai tele ona o la outou tatalo ma la outou tapuaiga. O upu a le atunu lau Afioga i le Fofoga Fatalai, e le sili le tai i lo le tapuai. E momoli atu le faafetai tele i lau Afioga i le Taitaifono o Ekalesia Soofaatasi, lau Susuga Leaupepe Kasiano ma le mamalu o le Fono ma le aufaigaluega totofi a le Atua, ua faamalo le tatalo, faafetai i la outou lagolago, faafetai i la outou taputapuai. Le tapuaiga ma le lagolago a le pule mamalu a alii ma faipule, faletua ma tausi, saoao ma tamaitai, le malosi o nuu taitasi i aumaga seia oo lava i le tupulaga, e leai se mea e mafai e lenei Matagaluega pe a ana tatou le galulue faatasi e ala i lo outou faautagia mai o fautuaga, le tuualalo, o le lapatai atu a le Malo ma le tauvalaau atu i faalauiloa ma tuualalo mo le silafia o vaega uma i le tulaga tau i puipuiga e ao ona tatou faatino, a o tatou i ai i lenei vaitami o le le mautonu, ona e oo mai i le taimi nei pei ona lausilafia e le i maua lava se fofo po o se vailaau e togafiti ma foia ai lenei faafitauli. Ia atonu o i ua tatou nofo manatunatu ai foi pe a tatou vaavaai ma tilotilo i le tele o tagata popoto ma saienisi suesue o le lalolagi, ona tatou manatua ai lea, ua na o le Atua e i ai le mana ma le malosi uma lava e mafai ona ia faasino ma taitai i tatou i mea e ao ona o tatou faia.

Lau Afioga i le Taitai o le Malo, lau Afioga i le Palemia, le Sui Palemia ma le mamalu o le Kapaneta, faafetai tele atu, faafetai le foe, faafetai le taitaiga i taimi faigata e pei ona tatou i ai i lenei faamai. Le lagolago malosi a lau Afioga i le Taitaifono ma le Komiti o Faalavelave Faafuasei, ua faamalo le galulue, faafetai le tautua atunu. Sa o tatou galulue faatasi mai lava i le uluai aso o le aliae mai, na amata mai i le misela, o lo o faaauau galuega faaauau mo le tau faamaeaina o le misela, ae toe poia mai loa tatou i lenei faamai o lo o tatou i ai pea, ma ua iso atunu o le lalolagi. O lea la e oo mai i le aso o lo o tatou molimauina pea le agalelei o le Atua i a tatou feau ma galuega aua le tautuaina o si o tatou atunu pele.

Lau Afioga i le Fofoga Fatalai ona oo mai lea o se faamatalaga, e pei lava ona ou fai atu e le tele ni vaega ua na o le faafetai ma le faamalo, aemaise ai foi o nai mea sa fia malamalama i ai sui usufono, faatasi ai foi ma ni nai a latou tuualalo sa fautua mai ai.

O le toatele o i latou ua faafetai mai i le faamama avega tele ua faapena ona tofu ai le falemai faa-itumalo ma sub-centres uma e le gata i Upolu nei ae faapea foi ma Savaii ma le fomai. Ia o se fuafuaga lea vaaimamao a le Malo, ua leva ona manaomia lona faataunuina, ua foia ai le tau malaga mamao mai o nuu i tua i Upolu nei i le falemai tele i Motootua, e faapena foi femalagaaiga i le motu tele i Salafai e tulituli mai le falemai tele i Tuasivi. Ua le faatali le Malo e ala atu i le auaunaga a lenei Matagaluega e omai tagata i le falemai, ae ua avatu le auaunaga i tua i le mea o lo o i ai le mamalu o le atunu ma ua foia ai foi le tele o faafitali i le tatou falemai tele i Motootua i le tumutumu, tele o taimi e faatali ai le atunu, o fuafuaga alumamao ia ina ia faapena ona fesoasoani i le limavaivai foi i pasese mai pasi, o le taimi faaalu ae atiae si o tatou atunu mo le agai i luma.

O le isi tulaga pei ona silasila mamao i ai le Malo, ia faapena, aua ne i faapito manu ia tasi, a ia maua e tagata uma o le atunu ma tutusa avanoa faale-soifua maloloina i taimi uma e moomia ai.

Tofa Olo Fiti Afoa Vaai (Salega Sasa): Lau Afioga i le Fofoga Fatalai...

SUI FOFOGA FETALAI: Ia, se i malie le Afioga i le Tamaitai Minisita se i tuu atu le avanoa. O le a le mea lea e tulai ai le sui usufono, se i faailoa muamua mai?

Tofa Olo Fiti Afoa Vaai: Faafetai. Na o se mea lava e fia faamalamalama lau Afioga i le Fofoga Fatalai.

SUI FOFOGA FETALAI: Fia faamalamalama? Ia saunoa.

Tofa Olo Fiti Afoa Vaai: Faafetai i lau Afioga i le Tamaitai Minisita, ua manino foi tulaga uma, e oo foi i le tapenaga a le tatou Matagaluega, faamalo faafetai. O lea lava e matau atu i le fitaituga foi o lau Afioga ma le Matagaluega aua foi le puipuiga foi o si o tatou atunu e tusa ai ma le tulaga pagatia o lo o i ai nei. Ae ona o lea ua oo le saunoaga a le Afioga i le Tamaitai Minisita i le tulaga o fomai ia ua agai atu nei i tua, manaia foi lea vaega. Na pau lava lou popolega lau Afioga i le Tamaitai Minisita, po ua lava tapena po ua lava saunia tatou fomai ia, ona o le toatele o fomai lea ou te vaai atu i ai, vaeatu lava lo latou mamalu, e fai si talavou, ma e le i lava foi lo latou tomai faapitoa e galulue ai na o latou. E i ai fomai ou te iloa e le i oo i se tai 5 tai 6 tausaga talu ona observe i fomai e lava lo latou silafia e taumulimuli ai se latou poto masani. Ae a faapea ua i ai, na pau lava le mea ou te popole

ai, i faaletonu mai se latou gaoioiga i tua, ona le iloa foi lea tuuai i nai fomai, ae ona o le fosi foi lea e o e faigaluega i falemai o itumalo. Ae ou te iloa lava e le i lava tapena. Ma le faaaloalo.

SUI FOFOGA FETALAI: Faafetai. O le a manino lava i le faamalamalamaga a le Tamaitai Minisita, e le i oo i ai le saunoaga, ae faafetai.

Saunoa lau Afioga i le Tamaitai Minisita.

Tofa Hon FAIMALOTOA KIKA IEMAIMA STOWERS: Lau Afioga i le Fofoga Fetalai, vagana o sau faatonuga ona ou tali lea i le sui usufono. E le i agai mai lava le sui usufono lea i nei mea o le... e agai mai i le Matagaluega o le Soifua Maloloina. Ia, o le sui usufono mamalu, leai o lau uo.

SUI FOFOGA FETALAI: E lelei la ona ou avatu le fautuaga, malie sui usufono e faauleavea, afai e le i lavea i lau lauga, e le tatau ona toe fesiligia le mea lea. Na ona toe faamanatu atu a o lau Afioga lava i le Minisita, a e le fia tali lava i ai, e le afaina lea vaega.

Se i tuu atu pea le avanoa i le sui usufono mo Salega Sasae.

Tofa Olo Fiti Afoa Vaai: Ou te faamalulu atu lau Afioga i le Fofoga Fetalai, leai sa ou... ou te faamalulu atu lava i lau Afioga i le Fofoga Fetalai, e moni, ae sa ou talanoa i le tamaoaiga, e lavevea uma ai lava mea uma. A lelei lou soifua maloloina, o le lelei foi lena o lou tamaoaiga. O le ala lena o lou toe tulai atu lau Afioga.

SUI FOFOGA FETALAI: Malie le sui usufono, a oo loa la i mea taitasi ona fesiligia loa lea o le mea lena e 15 ou minute e maua i le avanoa lena, ae o le a faaaauau le saunoaga a le Tamaitai Minisita.

Ia, se i saunoa Anoamaa Sasae.

Afioga Alaiasa Muagututia Moefaaouou Malagaitutogiai Sepulona Moananu (Anoamaa Sasae): Lau Afioga i le Fofoga Fetalai, ua matauina ua oo le saunoaga a le Afioga i le Minisita i mea sa laga i matou lauga. O lea la ua taunu le Minisita lea aua foi se talosaga a lenei itumalo mo se fale foi lea o le falemai ma le fomai. Ma ou te molimau atu o lea ua i ai le fomai, o se fomai e talavou, ae ese le atamai o le fomai. Ma matou te talitonu ua lava foi lea ma totoe mo le matou itumalo e tau ina sulu i ai lo matou itumalo pe a poia i gasegase o le tino. E faafetai atu ai i le Afioga i le Minisita mo nei fuafuaga matagofie. Na pau lava lea o lea ua logo mai o le a fai le fale. O ia mea uma na o le matou talitali lava lupe o maunu ma tapuaia faiva o le Afioga i le Minisita ma le Matagaluega. Manuia le tatou Fono.

SUI FOFOGA FETALAI: O le sao lava ia o sui usufono na o le faafetai lava i le talosaga ua talia, ae lelei faafetai. Malo saunoa.

Ou te tapa lau Afioga i le Minisita e faaaauau le saunoaga.

Tofa Hon FAIMALOTOA KIKA IEMAIMA STOWERS: Faafetai i lau Afioga i le Fofoga Fatalai. Ae le te i te i avatu nai alo ma fanau, o alo ma fanau a Samoa ua aoaoina lelei ma ua foi mai aoaoga i fafo, ma sa galulue ma fomai o lo o faatautaia le galuega ma taitaia le Matagaluega, ua latou silafia lelei agavaa ma tomai o alo ma fanau a Samoa. Ou te manumanu e tuuitiitia le agavaa lea ma le taumafaiga a nai a tatou fanau pei ona sa aoaoina ai.

E pei o se tulaga lea, masalo o le sui usufono mamalu mai Anoamaa Sasae o lena ua faailoa mai, o le a ou oo atu lava, o lo o faasolosolo atu pea tulaga foi e pei ona sa aafia. O le mea la lea o le faalavelave...

Ona ou oo mai lea i le faafesili a le sui usufono mamalu e uiga i galuega mo falemai ma fale o fomai, galuega faa-itumalo pei ona sa fesiliglia foi e le sui usufono mamalu le falemai i le itumalo o Saanapu. E masalo o le galuega lava lea i Saanapu faatasi ai ma le galuega i le falemai faa-itumalo o Samatau. O galuega ia i falemai faa-itumalo ia, o lea ua mautinoa o lea ua i ai le tupe, na fesoasoani mai ai le World Bank, galulue faatasi ai ma lo tatou Malo mo le faatinoina. O lo o faagasolo fuafuaga masani, ave i le Tenders Board, a maea uma loa tapenaga o mea ia ma tea le pisi, ma uma mai, pasia mai paketi, o le a faapena ona faagasolosolo atu le faatinoga o nei galuega i falemai o itumalo ia i Saanapu, faapea foi le faafogafoga mai a Falelatai, o lea sa sausaunoa a outou sui mamalu, e faaleo lea tulaga, o lea ua faailoa atu, o se taimi e le mamao pe a maea uma fuafuaga e ao ona faataatitia, o le a faapena ona faagasolosolo atu ia galuega. E pei la o le sui usufono lea mo Anoamaa, se falemai faa-itumalo ma se fomai mo Lufilufi. Ia faafetai, o lena ua silafia ua 2 nei masina talu ona i ai le fomai ua galue i le tatou sub-centre lea i Lufilufi. Ae ua i ai foi ia fuafuaga i le tatou falemai lea, o le a upgrade, faatele, faaleleia atili ina ia faaliliu o se falemai faa-itumalo, e fuafua foi i le vaai a le Matagaluega, i le toatele o i latou o lo o faapena ona autovaa mai i le tatou falemai lea i Lufilufi. O lea foi ua faafogafoga mai si ou itumalo, o lea lava e tuitui. O mea uma lava o lo o faapena ona faamau, ma fai atu foi asiasiga, e faigata le mamalu o le atunu e toatele foi lea vaega o le atunu. E faapena foi ia...

SUI FOFOGA FETALAI: Malie lau Afioga i le Minisita,

Afioga Alaiasa Muagututia Moefaaououo Malagaitutogiai Sepulona Moananu: Ua faageetia foi lagona i le saunoaga a le Afioga a le Minisita, o lea o le a upgrade le falemai, o lea ua faafogafoga mai le itumalo i se tali

fiafia foi i lea mea. E faafetai atu ai i le Afioga i le Minisita. Ioe, a tali lava faapea Minisita uma i o ta manaoga, pe oo lava pe le oo, ae o la ua ta fiafia ua tali mai le Malo i tulaga ia. E faafetai tele i lau Afioga, ia se i tagai ifo la ma le aualatele lea e alu atu e tau i le falemai, e fia faaleleia uma lau Afioga.

SUI FOFOGA FETALAI: O lea la ua mamao i tua le alu. Ae le talanoa pea na o falemai, ae faafetai i le saunoaga a le sui usufono mamalu mo Anoamaa i Sasae. Tulai mai le sui usufono mo Falelatai ma Samatau.

Afioga Taefu Lemi (Falelatai & Samatau): Faafetai i lau Afioga i le Fofoga Fetalai, ua malie foi i taliga le faalogo ma le matau i lenei taeao. Sa tulai foi le sui usufono mo Anoamaa, e manatu ne i nofoa'i lenei itumalo, ae o le agaga faafetai lava e tasi. Tau lava ina tatalo foi i le itumalo, o lea o le a fai le tatou falemai, o le falemai o le itumalo Samatau ma Falelatai, o le tatalo lava i le tatou nuu o Siufaga, o lea e i ai le fanua ua uma ona faavagavaga aua lea faamoemoe. Aua ne i faalavelave se isi, a o taumafai atu le tatou falemai. Manuia le itumalo manuia foi le Fonotaga lau Afioga i le Fofoga Fetalai.

SUI FOFOGA FETALAI: Tulai mai le sui usofono mo Safata Sisifo.

Afioga Leaana Ronnie Posini (Safata Sisifo): O le agaga lava lea e tasi, o le agaga faafetai tele, ona o le agaga o le faatinoina o le falemai lea i Saanapu aemaise lo matou itumalo. O le agaga lea e molimoli atu ai le faafetai tele, ona o le falemai lea o le matou itumalo ua leva ona i ai. Ae faafetai o lea ua faalogologo mai foi si o matou itumalo, o le a faatino le falemai. O le agaga faafetai lea lau Afioga i le Minisita.

SUI FOFOGA FETALAI: E manaia foi le faapepa o faafetai. O sui mamalu ua lauga i le faafetai i lenei taeao, ia faapepa a outou faafetai ma agai lelei i le Minisita, o le aloaia lena o mea. Malie lau Afioga i le Minisita se i toe tuu atu le avanoa lea po o se isi foi faafetai. O le sui usufono mo Aiga i le tai.

Susuga Mulipola Leiataua Laki (Aiga i le Tai): Lau Afioga i le Fofoga Fetalai, o le agaga lava e tasi lea na faafetai ai sui usufono ia. O le agaga faaopoopo lea lau Afioga, ona toetoe lava a le misi se Fonotaga ma ou talosaga foi i se falemai mo le matou motu i Manono-tai. O lea ua matau atu foi ma faafogoa Samoa, o lea ua tali isi falemai, ae po o le a se update ua i ai le talosaga a lenei itumalo, e ala i se falemai mo lou nuu o Manono-tai. Ma le agaga faaaloalo.

SUI FOFOGA FETALAI: O le a oo lava i ai le saunoaga a le Minisita, papale mai sui mamalu. Tapa lau Afioga i le Minisita e saunoa.

Tofa Hon FAIMALOTOA KIKA IEMAIMA STOWERS: Faafetai i lau Afioga i le Fofoga Fatalai, o lea e faafogaga mai ia le Ofisa Sili o Pulega ma le matou Matagaluega ua faamau uma lava a outou faafetai, Ua faafafiaina o outou itumalo i se taumafaiga a le Malo, e ala atu i lenei Matagaluega, i le tulaga vaai mamao lea a le tatou Malo. Aua e moni lava, a ou tilotilo atu i lo tatou naunau, faafetai lava i le aumaia o le faamuamua i le Soifua Maloloina, faapea foi aoaoga. Aua e pei lava ona malie i saunoaga, o le aoaoina lelei o alo ma fanau a se atunu o le manuia lea ma le lumanai mo le agai i luma. Ae a ou tilotilo la, i le tatou tautiga o lo o faaaoga ai a tatou fanau, a foi mai ma faailoga PhD ma le tele o faailoga o lo o i ai nei, ae mamai e le soifua maloloina lele, fai atu ai foi, sina vaivaiga foi lea. Ia o le a le aoga, e auma'i, e uma ae tatou toe sue ni tupe e tausi ai a tatou fanau nei na fia tausaga ma fia sefulu afe tupe sa faaaoga ai. O le mea lava lea, o lea ua ave le faamuamua a le atunu i puipuiga ma togafitiga, i lalo o le auga, tatou maua se Samoa fiafia se Samoa manuia, aemaise o se Samoa soifua maloloina lelei.

E pei lava ona ou fai atu, o lea ua faamau uma lava i lalo ia a outou faafetai, e silasila foi i ai le Matagaluega, i le agai i luma. Ae pei lava ona faatalasua le isi au vaega fai mai e uma ifo le... ua lelei lau faa-fomai. Aua tou te popole e uma ifo nai ou masina ia e totoe i le Matagaluega lea, aua o lea o le a uma le Paeaiga, ua faauu lau faa-fomai. Ou te maua uma lava outou ia pe a maua sau galuega i le falemai. Pe a outou sii mai atu, aemaise lava sui usufono o lo o faapena ona le faafetai. Na o se mea foi lea e tatou te talie ai... aua le fai mea ita, tatou talitalie.

SUI FOFOGA FETALAI: Se i tuu atu le avanoa i le sui usufono mo Salega.

Tofa Olo Fiti Afoa Vaai: O le matua ou faafetai pe a faapea o le a maua se avanoa... tomai. E pau lava le mea a faapea e maua sona tomai fomai tipitipi. Faamolemole aua ne i e faia le mea lena ia te au.

Tofa Hon FAIMALOTOA KIKA IEMAIMA STOWERS: E leai, o mea foi tatou te talie ai. Ae a sii mai...

SUI FOFOGA FETALAI: Aua le amanaia fua le pola motu i tua.

Tofa Hon FAIMALOTOA KIKA IEMAIMA STOWERS: Ona ou agai mai lea i sui mamalu sa sausaunoa e pei foi ona manaomia ni sub-centres, e pei ona saunoa le sui mamalu nei. E pei lava ona ou fai atu, e le o misi lava

mea uma, o lea ua uma ona ou faamaumauna sui usufono uma na sausaunoa. I le taimi nei, ua faamauna e le Matagaluega mo le faagasologa o ana galuega mo le lumanai, ia finagalo ua faapena ona taatia mai i totonu o le Maota fono. Ae le mafai ona tatou faia ni galuega se 20, 30 i falemai tetele i se taimi po o se tausaga se tasi. O lo o ave le tatou faamuamua i galuega ua aupito sili ona manaomia, o lo o manaomia vave. Aemaise o le faatotogaina o falemai i mea faigaluega ma tulaga eseese o lo o manaomia, aua lava le tatou soifua maloloina. A o sui mamalu uma na talanoa i le vaega lenei, o lea ua faafogafoga mai Leausa ma le vaega lea, ua faamauna, ma o le a agai i ai fuafuaga a le Malo. E fai aso fai taimi le Alii....

SUI FOFOGA FETALAI: Malie lau Afioga i le Minisita se i tuu atu le avanoa i le sui mamalu mo Falealili i sasae.

Afioga Fuimaono Teo Samuelu Teo (Falealili Sasae): O lea ua oo tonu lava Afioga i le Minisita i le vaega lea o le sub-centre.

SUI FOFOGA FETALAI: Sa taua i lau lauga?

Afioga Fuimaono Teo Samuelu Teo: Ia, o lea sa lavea i le lauga o le 2016, a o i ai si Minisita foi lea ua malaga atu i fafo. O lea la, na ona toe faamanatu atu, o le sub-centre lea na talosagaina i totonu o le itumalo, ona o lea ua vaeluaina, i le mea sa i ai le tamai falemai tuai lea, i le afioaga o Salesatele, o i sa avea ma centre e faafaigofie ai nai togafitiga laiti foi ia, ma inu ai nai fualau, e tau le oo mai Poutasi. E pau lava le talosaga a le sui usufono, po o lavea ane ai lou itumalo, i le sub-centre lea, i le lisi lea faatalitali mo le Paeaiga i le tausaga fou, ma le agaga faaaloalo.

SUI FOFOGA FETALAI: Saunoa lau Afioga i le Minisita, masalo ua faa-tolu ona e tali ai i le mea lea, ua aofia uma falemai, sub-centre.

Tofa Hon FAIMALOTOA KIKA IEMAIMA STOWERS: O le 2016, faamalulu atu i le sui mamalu. O le a ou alu nei sue ia faamaumauga o le 2016. O lea foi e faafogafoga mai ia Leausa ma le vaega, ona ua i ai i totonu o le plan ia tulaga uma ia, mo le tatou agai atu i luma. Faamau ane le vaega lea, se i o tatou asiiasi i ai i se tami o lata mai, ona faataatia ai lea, e le o toe mamaao foi lea tausaga ma le faagasologa i luma, ae ua faamauna i totonu o le ata mo fuafuaga a le Matagaluega, e agai i ai a tatou galuega.

SUI FOFOGA FETALAI: Malie lau Afioga i le Minisita, tuu atu le avanoa i le Afioga i le sui mamalu mo Aleipata Itupa i lalo.

Afioga Tafua Maluelue Tafua (Aleipata Itupa i Lalo): Faafetai i lau Afioga i le Tamaitai Minisita, e le faalavelaveina foi le saunoaga. E masalo foi ua ova faafetai ua avatu i lau Afioga, ua talafeagai foi lea. O le tele o faamai lea e pepesi aemaise o lau galuega. Ae sa ma lauga i le falemai i Lalomanu, ae o lea ua ou faalogo atu ai ua see ese lau afioga. E leai e le fia faia se falemai fou po o se isi vaega, aua ou te iloa o la e lelei le falemai. E pau lava le mea e talosaga atu ai, o le mea lea e i ai si teine fomai, o le fomai tamaitai le matou fomai la ua alu atu. Ae mo le saogalemu ma le upgrade ina, e le se upgreat foi lele, na o ni nai mea, ailoga e atoa se \$1,000 e faaalu ai e vali ai le potu e faamanaia ai ma fai le screen i fafo ma mea faapena. Pe maua foi sina TV e avatu e faafafia ai le tamaitai fomai, o le manaia lena. A o se isi mea e leai, faafetai atu lava mo mea uma. Manaia lo matou falemai, lelei mea uma, ae na o le pau lava lena o le mea. Se i toe faaleleia le potu o le tamaitai fomai faamolemole ma le faaaloalo, na lauga ai si ou uso mai tua, faafetai.

Tofa Hon FAIMALOTOA KIKA IEMAIMA STOWERS: Malo faafetai i sui mamalu na sausaunoa. E pei lava ina ou fai atu, o lea ua i ai le tatou polokalame lea e maua le tatou fesoasoani mai le World bank. O lea ua fuafua o le maea o le Fonotaga a le Palestene i se taimi lata mai, ona matou toe faamautuina loa lea e ala i le asiasiga. E le gata i Upolu nei, ae faapea si o matou motu i Salafai, matou vaavaai ma faamauina uma, ia tulaga ia. Aua o le polokalame la lea, o lea ua avatu faatasi ai ma le faaleleia o falemai uma faa-itumalo ma sub-centres, ae le gata i lea o le fausiaina o maota e mapu atu i ai fomai mo fesuiaiga, ina ia faamautu atu le aufaigaluega, a o manaia ma matagofie. Aua e lelei foi, o tatou uma lava, a tofi oe e te alu i se mea, a e alu atu e le lelei le environment ma e le fiafia i le tulaga o lo o i ai, ua augata foi e fai le galuega. Ae o mea uma lava ia e pei ona outou sausaunoa mai, o le faataatiaga lea o lea ua i ai, i lalo o le fesoasoani lea, o le faaleleia o falemai, ma le fausiaina o maota mo fomai, i lea itumalo ma lea itumalo. Sa saunoa foi nisi o sui usufono ma faatalosagaina ni taavale falemai ambulance. Mo le feaveaia o gasegase aemaise taimi o faalavelave faafuasei. E faasilasila aloaia atu foi i se tulaga fiafia. Maua mai le tatou fesoasoani lea mai i le Malo o Iapani. E masalo pe 7 pe 8 ia taavale faapea, ambulance, o lea o lo o faatali ma o lo o faia pea ia fesootaiga mo le vave faataunu mai o lea fesoasoani. Ona faapena foi lea ona faasoa atu e le Malo, i se tulaga faasoa lima lelei, aua le faapito, fuafua foi i le mamao, aemaise o le toatele o tagata po o le population o lo o serve e lea falemai ma lea falemai, e le gata i Upolu nei ae faapena i Savaii. Ae ave foi lava le faamuamua i tatou falemai tetele ia, i Motootua nei faapea foi Tuisivi o lo o faapena ona tele galuega o lo o o manaomia ai, aemaise lava taimi o faalavelave faafuasei, e pei ona tatou i ai nei. Saunoa se tasi o sui mamalu i tulaga tau le faa-nofoesea o i latou o faimalaga mai Niu Sila, pe le

ua tatau ona o sao i aiga, ona o lea ua leai nisi o toe mamai i Niu Sila. Le mamalu o le Maota ma le faafofoga mai o Samoa. O lea tulaga, e pei lava ona tatou matauina mai lena vaiaso. O lea ua toe faaopoopo foi sui i Niu sila ua maua i le faaamai. E pei lava na 9 ananafi ae ua 10 i le aso. Ma ua amata ona sau le second wave foi lea e masani ona tatou vaavaai i ai. O le tulaga la lea, o lo o silasila totoa i ai lo tatou Malo i taimi uma, ma o lo o tulimatai ma monitor lelei ma le faaeteete, e le gata o le Matagaluega nei o le Soifua Maloloina ia ae faapea le Komiti o Faalavelave Faafuasei, i aso uma aso taitasi, taualumaga uma o le faagasologa o le faamai i lea atunuu ma lea atunuu o le lalolagi. Ae le i tuuina mai i le Kapaneta so o se lipoti ma so o se fautuaga mo se iloiloga ma se faaiuga a le Kapaneta mamalu mai lea taimi ma lea taimi. Atonu o le tele foi ia o tagata o lo o talanoa mai, matou faasolo atu i nuu i tua, o atu foi i Savaii, o le fautuaga lava lea o lo o aumaia ma o lo o faapena foi, o lea e faafogafoga mai le Taitai o le Malo ma le Kapaneta, o lo o faapena lava ona tuu mai i luma o le laulau a fono o le tatalo lea a Samoa. Faafetai ua talatala, talatala, talatala, o lea lava ua toeitiiti tatala uma lava mea uma, i lo tatou manao lava lea. Ua na o se tala e tuualalo pea, o le tatou manao e mafai ona faatino, ia ae a tupu mai ni pefea, e le iloa po o ai a tuuai i ai. O le fesili, o fea sa i ai le Maota nei? O tatou uma o taitai o le atunuu, e na ona ou faapena atu. E ui i le taugata faigata, ma le tele o taimi ma auaunaga eseese e aafia mo lenei tulaga o le faanofoesea. A o le priority ma le faamuamua o le puipuiga lea mo le saogalemu o le atunuu. A o tatou i ai pea i le vaega lea o le quarantine po o le au faanofoesea. Sa i ai foi se fiangalo sa faalia mai e se tasi o sui mamalu, po o a se tulaga o i ai, ina ia faatofutofusia faletalimalo, e tufa atu i ai i latou nei, aua foi ni nai seleni mo ia foi pisinisi. Mo le faafofoga a le Maota ma le mamalu o le atunuu, o le tulaga lea o lo o taumafai atu i ai le Matagaluega ma le Komiti, e faasoasoa, ae fuafua foi i conditions po o manaomiaga manaomia mo le saogalemu. E i ai nisi o faletalimalo latou te le o manaomia le tulaga lea, e tofu lava ma mafuaaga ou te le tau faamatalaina. E le talia e nisi lea foi itu, ae o nisi foi maota talimalo, e le o mautu ia nisi foi o tulaga manaomia mo le faatinoina o le faanofoesea lea, i le vaavaai a le Komiti, aemaise foi i tulaga tau le soifua maloloina.

Tulaga i tatou borders e pei ona afea foi e se tasi o sui usufono, po o le tatalaina lea o femalagaiga mai fafo e pei ona faalia i finagalo. O la e faafogafoga totoa atu le Malo e faia faaiuga i so o se mataupu e tusa o lenei faamai. Ae o se vaivaiga o le Matagaluega e tautau ai pea le Matagaleuga ina ia faapena ona silasila totoa pea, sei vagana ua kilia mai Niu Sila, kilia mai Ausetalia kilia mai Fiti, e pei o faitotoa ia o lo o auala mai ai isi atunuu atu i tua. Ona avatu foi lea o se fuafuaga ma se fautuaga, aua le iloiloga a le mamalu o le Kapaneta. Faafetai sa afea e se tasi o sui mammal na saunoa, i le ono faavaeina lea o se scheme mo health workers. Po o le aufaigaluega a le Soifua Maloloina o lo o faatinoina...

SUI FOFOGA FETALAI: Malie lau Afioga i le Minisita, se i tuu atu le avanoa i le Palemia.

Susuga Hon Tuilaepa Auelua Fatialofa Lupesoloai Lolofietele Neioti Aiono Galumalemana Dr. Sailele Malielegaoi (Palemia): A o le i see ese le saunoaga a le Minisita, lau Afioga i le Fofoga Fatalai, ma le mamalu o le Maota, e taua tele lana faaaliga lea sa fai. I le naunau o le tatou atunu, i latou ia o lo o i fafo e fia foi mai. Ae o le tele foi o le tuualalo ia e aumai i le Malo, ia taumafai e taofiofi, taofiofi tuu ai pe a i o, se i maua se vailaau po o se fualaae tape ai le siama lenei. O le malolosi lea o uunaiga o lo o feagai pea feagai pea ma le Kapaneta aemaise le tatou Komiti, o lo o faafeagai ma fautuaga nei e tuuina mai i le Kapaneta mo le puipuiga. O le ala foi lea lau Afioga i le Fofoga Fatalai, e augata ai le finagalo o le Kapaneta e soona tatala tele. Ma ua uma foi ona tuuina atu le lapataiga, o le taimi e mapuna ae ai se tagata i inei, ona toe foi uma lava lea o le tapu i le mea sa i ai, ma e ono sili atu le tulaga e ono faaopoopo ai ma nisi tapu. Ona e sili atu ona mafatia le atunu lenei aemaise le puipuiga e tatau ona fai mo i latou o lo o tutu i luma. O i latou ia o fomai, ma le aufaigaluega atoa o lo o faafeagai ma le puipuiga. Aua o latou lava e muamua aafia, o latou e faalupe o i latou o lo o avea ma muaau a Samoa, i le taua lea e faafeagai nei ma le atunu ma le lalolagi. Aua o le uiga lea o le upu, muaau, o latou ia e muamua lava feoti i so o se taua. E faafeagai ma pulufana, i so o se taua. Ae tutu mai lava Taitaiau i tua, e mulimuli lava feoti. Lau Afioga i le Fofoga Fatalai, o itu ia e fai faaiuga a le Kapaneta ma le tiga, e le gata i le tiga alofa ia i latou o lo o aafia, ae o le tiga alofa ia i tatou o lo o i Samoa nei, aemaise i latou o le muaau. Lau Afioga i le Fofoga Fatalai, o le mafuaaga lea, e famamafa atu ai pe a i faasalalauga o lo o fai nei, i ai latou e le o manatu, po o manatu mama i tapu nei o lo o fai e le Malo. Aua o mea masani lau Afioga i le Fofoga Fatalai, a tulai mai loa se tulaga matuia, e le toe fesili lava ia le Malo i se isi mo sana fautuaga. Afai e aafia le Malo lenei i se afa ma maliliu tagata, e le toe fesili lava au nei ma le Kapaneta ma le Komiti atoa, i se isi i sana fautuaga. E pau lava le mea o le limataitaiina loa o le Kapaneta i le faautautaga tatau. O le faautautaga tatau e aumai le Atua, e limataitai ai le tagata i taimi o faalavelave, o auauna a le Atua, e faatino loa le galuega e tatau ona fai.

Lau Afioga i le Fofoga Fatalai, o le ala lea e faataua ai tele ia le saunoaga lea ua oo i ai le saunoaga a le Tamaitai Minisita, o ia lea na te molimoli maia i le Kapaneta le tuualalo a fomai. Ia, ma valaauna foi e le Kapaneta i latou uma e fono ma le Kapaneta. O isi aso e fono i le Aso Sa, fono i le Aso Toonai i po, taatia ese uma lava ia galuega e fai. O le ala foi lena e taumafai ai le Malo, e avatu pea avatu pea ia tulaga e tatau ai. O nisi vaiaso o aso uma, ina ia fofoga le atunu, le atunu o lo o faatalitali, faatalitali ma le gatete po o le a le mea o le a oo i ai. Lau Afioga i le Fofoga Fatalai, o se tulaga taua tele

lea ua oo i ai le tatou felafolafogaiga, aisea? Leaga o la e tumu Niu Sila ma Ausetalia ma Amerika i tagata e fia o mai. E pau lava lea o le mea lea e manatu i ai, o le oso i le vaalele sau loa. Ae e le o faamaoni, e le o faamaoni atoatoa, 100% le faamaoni, i le puipuiga o i latou lava i le o mai ma aumai le faamai. Ua tatou masani, ua tatou masani lava i mea ia, e i ai lava le tafulu, e i ai lava le pepelo, aisea? E pau lava le mea le mea la e faataua e le tagata, o le fia tietie i le vaalele sau loa. E le alu e fia fai ni tui, e le fia faia ni tui, e le fia inuina ni fualau. A lea e anina mai lava i faasalalauga a tatou fanau, o la e tiga na malu puipuia le nonofo ai i vaa, ae ua le uma le fia o mai, ma tau leagaina ai faaiuga nei e fai atu i inei. Ae ua uma foi ona tuualalo, ia faautauta lelei lou sau ae na e te lavea pe e le faamaoni, aisea? O le teine lea na lipoti muamua, o le a le mea na tupu? Na ona alu atu lava o le faasalalauga fono loa le nuu, fono loa le nuu e le i toe faatali. O le iuga o le a fai ia te ia ma le aiga, ua laki le vave i ai o fomai. O le mea lea, outou nei e fia o mai, ia outou nonofo lelei ma le faaeteete, aua o le taimi e laga mai ai se tagata o outou ua sau, o oe ma lou aiga atoa, o lau fanau, e faasalalau atoa i luga i upega tafailagi, e i latou ua tumu i le inokino, faasiugutua atoa ai oe ma ou matua ma le tou aiga atoa. O upu leaga uma o le lalolagi lenei e alu atu ia te oe, sa sili ai ona e le sau. Ona e oo loa i mea e aafia ai le ola o tatou tagata aafia ai le ola o fanau pele, ona nofo sauni lea o le tagata e sau i Samoa ae le faamaoni, ia e manatu i isi tagata e ono afaina ia te oe, ona o le tulaga lea o le tele o le manatu faapito, o le manatu lava o le tagata ia ia te ia. Lau Afioga i le Fofoga Fetalai, o le ala lena o le taofiofi, taofiofi pea le Malo, aua e le tua lelei le tagata e faia ni amio faapea. O le taimi sa matou i le Kapaneta muamua lava. E i ai le fono na fai, na tulai ai le Taitai o le Malo, ua fai i lagi le folaua, tu ae le matou Taitai, tutulai atu i i le mea lea ou te tutu atu ai, o lana saunoaga, outou uma o fia o i Niu Sila, ae omai ia te au e fia maua se fesoasoani aua tou te toe omai. Ua matua ou le talitonuina ni tagata e omai ia te au, ou te faafesootaia le Ofisa o Niu Sila ma Ausetalia. E faafia ona leaga lou igoa, o le igoa o le Palemia, i lana molimau e toe foi mai. O nisi o faifeau, e o e ave a latou autalavou, fai ia folafolaga i luma o le Palemia e aua le popole, e toe foi uma mai. Ae uma ane, e tele le overstayer i Niu Sila, e fiu e amiami le faifeau ua solasola.

O lea tatou te iloa lau Afioga i le Fofoga Fetalai, i latou o soo o le Alii, po o aposetolo e toa 12. Vaavaai uma lava i vavega. Vaavaai uma lava i vavega na faia e le Alii. Ae na ona oo lava i le taimi na faasatauro ai ia lo tatou Alii, e le i toe i ai se isi na talitonu e toetu mai. Na ala foi ona maua Ioane ia i ina, ona ua faigata ia ia ona sola o lea tu tu ma le tina o le Alii. Ao isi, ua sue lava le mea e ola ai le tagata ia. O le isi, ua nofo ma faatau lo tatou Alii i tupe. O le isi ua matua tautino lava, seiloga lava ou te pai i ai faatoa ou talitonu.

O le taimi la lenei, a tu tu mai se isi ma lauga mai i luga ma fai mai o au e amiontonu, ua ou manatua vave lava le mea lea, ua ou manatua vave lava le

mea, faatasi ma le Alii i taimi uma taimi uma, taimi uma. Ae na oo loa ina tutupu faalavelave e leai lava ma se isi o latou na talitonu e toetu mai le Alii. O le ala lena na tetei ai, ma toe tamomoe i o e vaai pe moi.

Lau Afioga i le Fofoga Fatalai, o le tulaga lena. O le tuualalo, o le tuualalo i ai latou o tatou aiga i Niu Sila e fia omai ma Ausetalia. Silasila totoa i aiaiga ia e avatu, ia outou tausisi i ai, aua o le tagata e sau, ae tulai mai ai ni faalavelave, ia talofa ia te oe ma lou aiga, o le a polili ituaigna gagana eseese, ona e faapea ane ai lea, ana ou iloa lava, ou te faia uma lava mea ia na faatonu atu e fai.

Ae o le lalolagi lenei e tatou te i ai lau Afioga i le Fofoga Fatalai, e tumu ai lelei, e tumu ai foi ma mea leaga. Lau Afioga i le Fofoga Fatalai o lau fesoasoani atu lena e toe molimoli le agaga popole lea e i le Afioga i le Minisita, i le Tamaitai Minisita, ia ma le latou Matagaluega.

SUI FOFOGA FETALAI: Malo saunoa i lau Afioga i le Taitai o le Malo, ua faafogfa le Maota ia ae faapea foi le mamalu o le atunu. Manino ma malamalamalelei, ia tulaga o fautuaga aua le manuia ma le saogalemu o ona tagata, ia ae lautua i le alofa. O le mea la lea e faamalo i le saunoaga a lau Afioga, i le Taitai o le Malo. Tapa lau Afioga i le Minisita e faaauau lau saunoaga.

Tofa Hon FAIMALOTOA KIKA IEMAIMA STOWERS: Lau Afioga i le Fofoga Fatalai, ia e faafetai foi i le Taitai o le Malo, i le fesoasoani mai e toe faamamafa le tulaga o lo o faapena ona augani atu ai i le taimi nei. Ia e le mo se tagata e toatasi, ia po o le tatou Maota nei, e mo Samoa atoa.

Ae ou te toe... ua ala la ona fai atu lau tala lea ou te manatua lava le tele, i le amata mai o le faalavelave lea o le faamai. Tele foi o faitioga ma tuuaigna i le Matagaluega ma le Malo. Aua po o a fuafuaga a le Matagaluega e aumai uma lava i luma o le Kabeneta. Na matou faafoia ia nai tagata foi ia o tatou, faafoi i Fiti, e toa 5 le au vaega na foi mai i Initia, aua foi lenei ua uma ona screen atu i i ia o lo o... toe faafoi lea i Fiti.

O le sau o le faitio a le atunu, e le gata o totonu ae faapea foi ma fafo. Ou te ofo, o la ua toe faafoi lava e latou ia o latou tagata. O isi taimi na matou faafoiina vaalele. Ou te mafaufau pea i ai i le leva o le po o la e tofafa ma momoe filemu lo tatou atunu, ae o lenei e feoai faapenei ia le aufaigaluega a le Malo, ia faapea foi ia lenei Matagaluega. O le a se fuafuaga a lau Afioga i le Minisita o lea ua... o le vaalele e fia selau le pasese ae o lea ua aafia le a, aafia le a, aafia le a... Na ona ou faalogologo lava i le timu mai o lea, faitio mai o lea, o atu i le fale i le leva o le po...

Ia pau lava le tala sa tuualalo pea ma talanoa ma le aufaigaluega, tatou onosai, talia fautuaga, let the people talk, o le latou lea aiatatau. Ae tilotilo lelei i vailaina eseese, po o le a le mea e tatau ona fai. Faatusatusa le toavalu lea ua faafoi, i le toa 200,000 ma ona tupu a le population o Samoa, o fea e

fua i ai le mamafa o lau faaiuga e fai. E ese le taua o lou nofo i lalo ma e tatalo aumai mafaufauga lelei e fai ai lau faaiuga.

Ia o la ua fai mai le au vaega la e i o o le malaevaalele a saini atu lava lau Afioga i le Minisita o lena. Ia ona ou faamalamalama lea i ai, e le faia toatasi e se Minisita se faaiuga o mataupu lenei o lea e tatou te i luga o poloaiga o faalavelave faafuasei. O le taua lena, o le taumafai e tuutuualalo atu i taimi uma taimi uma, ae o mea na o lo o tutupu. A oo loa i le taimi e faitio mai ai, ia o le tuualalo lava lea, tatou onosai, tuu pea faitioga, e sau malama, malamalama, ae fai le mea e tatou te iloa e tatau ona fai, ona avatu lea o le fautuaga i le Kapaneta, ia e faapena lava ona fai lenei galuega e oo mai i le taimi lenei, o le tulaga lena o lea e tatou te i ai.

Ona oo mai lea o se faamatalaga, i le sui usufono sa sausaunoa ma taua foi pe le i onomea ona fai se scheme mo Health workers, le aufaigaluega a le Soifua Maloloina, o lo o faatinoina galuega faigata o le puipuiga pe afai ae aafia lo latou soifua i le faatinoina o nei ituaiga galuega. O se finagalo e talia gofie e lou nei taofi, ma o se fuafuaga ua alagataatau ona vave faatino o lea e faafogafoga atu le Taitai o le Malo, ia faapea le Kapaneta aemaise lo tatou Maota, e faia faaiuga. Ia po o se insurance faapitoa e taui atu ai, i se soifua o le a maumau, i ituaiga galuega nei mo le puipuiga o le soifua o le mamalu o si o tatou atunuu.

O lea sa tatou faalogolog foi ananafi i le finau malosi mai ai a nisi o sui usufono, ia aua foi galuega faapenei o lo o faatinoina e isi Matagaluega a le Malo ae o lea ua ou talanoa atu, i le tulaga o galuega faa... e momomo le loto ma le mafaufau, i le faigata e pei foi ona saunoa nei le Taitai o le atunuu, expose lo latou soifua ma lo latou ola, e faafesagai ma le oti i taimi uma, pe a pisia i le faamai lenei, faasosolo mai ai i le aiga i le fanau, tele le faafitauli, e trace ai ia... ae e pei ona saunoa le Afioga i le Palemia, o le au frontliners ia a tatou, o taimua ia e talipupuni i lo outou soifua ma so matou ola.

Ia atonu o se taimi o le a faapena ona tilotilo i ai le Malo i le... e le gata mo le soifua maloloina, ia ae faapena foi i le tele o isi Matagaluega o lo o faapena ona faatinoina galuega faigata faapenei. Faapena foi ona talanoa mai ia le sui usufono lava lea, i le ono faatuina e vaavaai i se Nursing Community Training Centre, mo le aotauina o le aufaigaluega tausi soifua. Ia malo le lagalaga i mea lelei ma faatupu manatu. O le a faapena foi o lea ua faamauina e le Matagaluega aua le agai i luma o le Matagaluega a le Soifua Maloloina mo le atunuu i le lumanai.

Sa faapena foi ona aafia i saunoaga ia faatasi ai ma nisi o sui usufono mamalu i mataupu o le toe faaolaolaina o le Komiti Tumama aemaise foi o sui usufono sa saunoa mai, mo ni sui o Komiti Tumama i totonu o falemai faaitumalo taitasi. E le gata i Upolu nei ae faapea foi i Savaii. O le toe faaolaolaina o Komiti Tumama, o se galuega ou te saga momoli ai pea le faamalo ma le faafetai i le Afioga i le Minisita ia Tuitama, le Pulega ma le Matagaluega o Tina ma Tamaitai, Nuu ma Afioaga ma Agafesootai, ona o

le latou lagolago malosi i le faamautuina o le tulaga lea. O se agaga fiafia ma le faagaeetia i le toe vaia o le taupati ma le sapasapai e tina i totonu o komiti e tele nuu ua matou uia foi e matou, ia ua toe aafia galuega faale-soifua maloloina i a latou polokalame o aso fai soo, o latou tiute.

Faafetai foi i le faaaauauina pea o le tatou galulue soosoo tauau ma le vavalalata i taimi uma i le Matagaluega i polokalame faaaauau. I le amata mai lava i le taimi na afatia ai Samoa i le misela, ma faaaauau mai ai lava ia le mafanafana lenei faigapaaga a le Matagaluega nei ma le Matagaluega o Tina ma Tamaitai, seja oo mai lava i le taimi lenei, i le tatou feagai ai ma puipuiga eseese o lo o faagasolo mo le matautia o le sauau o le Koviti-19, ia e pei ona aafia ai le tele o atunu o le lalolagi.

O le taua foi o le i ai o sui o le Komiti o Tumama i totonu o falemai faaitumalo i Upolu nei ma Savaii, ia o se tulaga lelei e aotauina ai foi sui nei, i galuega faale-soifua maloloina e mafai ona aoaoina, ma tufa mai ai sui o komiti, ia ma faapena ona apalai ai le tatou soifua lea i totonu o aiga ma totonu o nuu ma afioaga, e faaaauau lo tatou ola tumama i le soifua maloloina lautele, ina ia puipui ma faataua i taimi uma le mataupu lea, ina ia malosi o tatou tino, e tetee atu i puipuiga, i le taimi e oo mai ai faamai faapenei. So faafetai atu i sui usufono o lo o lagalaga manatu lelei, ma e taua tele ia soifua maloloina ia lea foi itu.

Sa i ai foi le sui usufono mamalu sa faafesiligia ia le tulaga o i ai tatou togafitiga i nai atunu i fafo. Faafetai foi i le fesiligia ona o le tele o taimi o lo o faapena ona tuufesili atu i le tulaga o i ai ae o se faamatatalaga e faapea, na loka loa borders a Niu Sila, aumai loa ma le faatonuga, e taofi mai le toe avatu ina o ni gasegase a Samoa o le scheme lea, seja toe aumai se isi faaaliga. Ua faatonuina e le Malo o Niu Sila, e le toe talia i totonu o falemai a Niu Sila, le toe avatu o ni gasegase i fafo mai o Niu Sila, seja toe i ai se taimi ona logo mai lea. Ia o le taimi nei, e tele nisi o talosaga ua maea ona ave i ai le ioega ma le approval a le Kapaneta, mo le avatu i fafo, o lo o taatitia pea i luga o lau kesi i totonu o le Ofisa, e faatalitali.... maumau e pe ana o tatou pule.... e pei o le upu foi lea e pule lava Sitafuli i lona vaa. E pule Niu Sila i o latou falemai, ma o lo o faapena ona felogotai pea, ma o se taimi e maua mai ai... ia faapena foi lea ona amatalia ia le tatou scheme lea, e pei ona nofo faatali i ai le tele o isi tagata ua uma ona approve ia o latou togafitiga, ae o lo o faatalitali pea.

Afioga Sulamanaia Fetaiai Tauiliili Tuivasa (Vaimauga Sasae): Lau Afioga i le Fofoga Fetalai...

SUI FOFOGA FETALAI: Malie lau Afioga i le Minisita se i tuu atu le avanoa i le sui usufono mamalu mai Vaimauga.

Afioga Sulamanaia Fetaiai Tauiliili Tuivasa: E muamua ona momoli le agaga faafetai i lau Afioga i le Fofoga Fetalai, i le taitaiga foi o le Fonousu a le atunu i lenei taeao. Ou te le i faalavelave lava i le lauga matagofie a le Minisita lea o le Soifua Maloloina. Ia ae sa taua i lau lauga ia le tulaga lea i faletalimalo. Sa tuu lava se i e saunoa lava. Faafetai o le tulaga lena. E tele foi o nisi o faletalimalo ua aumai foi le faasea i le tufatufaina. Ae o lea ua manino lau saunoaga i le vaega lea. E le gata foi o faletalimalo ae o nai aiga foi ma o latou fale mautotogi. O tagata taitoatasi pe le mafai ona faasafua atu i ai le tulaga lea i tagata e omai mai tuu i luga o le vaaiga a lau Matagaluega ma e o vaaia lea tulaga.

O ou oo mai i le tulaga lea i le scheme lea, ia e momoli le agaga faafetai, leaga o la e faalogologo foi si ou itumalo, i le tele o gasegase o lo o faatoai mai ma aumai talosaga, ina ia tuuina atu i fafo. Ia o lau tali la, e le o mafai ona i ai lea vaega ona o le silafia foi o lea tulaga ua i ai.

Ia ae o maua pea lou avanoa, e momoli foi lou agaga faafetai, o lea foi na malele le Taitai i le taeao lenei, ona o le itumalo lenei, ona o lea sa faatatau foi i ai le saunoaga a le Taitai, na amata mea lava ina ua i ai le teine lea na masalomia. E pei la o le faamai lenei, na muamua lava masalomia ai se tasi o lenei afioaga o lenei itumalo. Ia ma e sao lele lava sa fonoa le nuu. Ia sa faatalitali lava le fono se i alu atu le sui usufono ma fai se tala, ia pau lava lau tala ia, leai, e le o faamautino. E le o mautino le tulaga, ae amuia tatou ua faatupu manatu ai le atunu ina ia aware loa. O lea la ua i ai le puipuiga lenei, na amata mai i o i lou itumalo, aua na le aliae le tulaga lea, e leai se puipuiga o le atunu.

O lau tala lena na fai i lou itumalo, amuia tatou. O lea ua amata mea ai, ia o lea la ua faapena ona fai ai ai. Ae e pau le agaga sa aumai e si ou itumalo aemaise lou nuu lea sa ...fai mai o le a su le Malo. Ou fai atu lea aisea? O lea e le i mautino pe maua le teine lea ae o lea ua alu ua tau le igoa paia o lo tatou nuu. E iloa tatou e tau loa igoa o afioaga e pei o le agaga lena... ou fai atu leai e le o le Malo. O nusipepa ma tulaga na ua o faalauiloa le suafa o le tatou nuu. Ae faafetai o lea ua amata mea. E pei o le agaga lena o le faafetai o lenei itumalo, o i... o le isi vaega taua, o le nuu lenei i totonu o le itumalo lenei, o le faamai foi lea i le 1918, e leai ma se isi na maliu ai. O le mea lena na ou fai atu ai isi afioaga lea. Amuia tatou, o lea ua tatou amata mea i le talaiga o lenei faamai, ia i ai le awareness o le atunu. Ae o lo tatou lava nuu, leaga ua uma ona faapaia ai... o Isaraelu lea lea e i ai. E leai lava se isi e oti i le faamai lea.

E pei o le agaga faafetai lena e avatu i lau Afioga i le Minisita, ia ma le isi foi tulaga i lau saunoaga, fai mai o le a e alu e ave sau faafomai, leai, a lea ua promote oe e sau i lalo e alu i luga i le tulaga Minisita. E te tau le afio la e ave sau faafomai, pau lava lau faatonuga, avatu i fomai e fai le mea lea e te finagalo i ai. Ia ona.... ae e te le tau afio e fai sau faafomai. Faafetai ua autasi mo le taitaiga o lenei Fonotaga, se ese le logo malie, manaia o lenei

taeao. Sui foi le faalogologo a le atunu i le taitaiga o le Fonousu a le atunu, ia o ou mama na. O la e inaina lava nai Minisita Lagolago, ae o le taimi lava e i ai faamanuiaga, e oso atu i luga, taeao foi e toe oso mai lalo, o faamanuiaga na a le Atua.

SUI FOFOGA FETALAI: Ua malu lava le aumaiga ma le momoliga o lau saunoaga, ia, ua ta matua foi. Ia le mea lea ia oe le uso, ia malo saunoa. Faafetai o la e faafogaga mai le itumalo, ia o lea lava e te tauave lo latou finagalo i totonu o le Maota. Faafetai tele mo faafetai mo fautuaga.

Ae ou te tapa lau Afioga i le Minisita e faaauau lau saunoaga.

Tofa Hon FAIMALOTOA KIKA IEMAIMA STOWERS: Ia faamalo atu lava i le onosai foi ia ma finagalo foi o lo o tutulai mai ai sui usufono. Ia atonu o le ala lea o le tomua o lau faafetai i le amataga, faafetai tele i le lagolago a Samoa, alii ma faipule, faletua ma tausi vaega eseese, ia o lea foi ua toe faailoa lou finagalo, o le faafetai lea. O le tatou galulue soosoo tauau, ma le tatou galulue faatasi i taimi uma, ina ia saogalemu Samoa i le tele o faafitauli o tulai mai i lea taimi i lea taimi.

Ia vagana ua i ai se isi mataupu ae...

Tofa Lealailepule Rimoni Aiafi: Lau Afioga i le Fofoga Fatalai...

SUI FOFOGA FETALAI: Malie le Afioga i le Minisita se i tulai mai le sui usufono mo Faleata.

Tofa Lealailepule Rimoni Aiafi: Lau Afioga o le mataupu taua lava lea sa laga i lau lauga... matau atu ua faaiuiu le folasaga matagofie a le Minisita i vaega uma. [.....]. E le o se tala avane ai lau Afioga, o se vaega taua tele lea. Pe le i tagai lau Matagaluega e fai ni tou polokalame foi ia e faalauaitele i luga o le leitio, faaaoga le leitio lea a le 2AP. Fesoasoani i tagata e tapenapena o latou mafaufau i lenei taimi, tulaga faapena, ona e tele tele le afaina pe a... ae taua.

O lau faalogo, ua matua tumu lava le tou mental unit la i le falemai i le taimi nei. Ia ae e taua tele le vaega lea lau Afioga e te tagai mamao i ai, ona o le faamai lenei o le stress, e activate ai uma ai ma isi mau mai eseese. E muliga le oo mai o le faamai lea, ae muamua uma le toatele i le faamai lea, ma le faaaloalo lava, faafetai.

Afioga Sulamanaia Fetaiai Tauiliili Tuivasa: Lau Afioga i le Fofoga Fatalai pe maua se avanoa...

Susuga Hon Laauli Polataivao Leuatea (Gagaifomauga Nu.3): Lau Afioga i le Fofoga Fatalai, sina avanoa...

SUI FOFOGA FETALAI: Malie sui usufono o lo o tutulai mai se i tulai atu le avanoa lea i le sui usufono o Vaimauga Sasae. Malie le sui usufono e faapuupuu mai.

Afioga Sulamanaia Fetaiai Tauiliili Tuivasa: Se ioe, leaga ou te popole mo faamaumauga, ona o lea e tau le mental. O le mental o le tagata ua leai se faiai. Ae o le sui usufono lea, o lea e iloa uma lava e le Maota, e foi na... o le taimi e momoe ma le Afioga ia Peseta. Ae vaai i le faaleagaina o le malaevaalele a Peseta i totonu o le Maota lenei. E matautia, e pei la o le agaga lea e avatu ai le tuualalo, aveese faamaumauga ia. Ia a mental o lea e lauga na sau lava o lauga o lea o le a uma lava o lauga. O le mental la le mea lena? Aveese ma faamaumauga a le Palemene ia saunoaga ia leaga e le valea le sui usufono o Vaimauga. O le sui usufono atamai lava na o lea e i totonu o le Palemene lenei.

Tofa Olo Fiti Afoa Vaai: Lau Afioga...

SUI FOFOGA FETALAI: O lea o le a fai lou finagalo le sui usufono o Vaimauga i Sasae. Ia e poloaiina ai le Failautusi e aveesea, e aveese upu ia, ia e le taugamalie foi i le faafogaga a sui usufono mamalu o le Maota. Tausi pea lo tatou vatapuia. E uma Tulafono Tumau, o le Tulafono mulimuli lava lea e ao ona tatou usitaia. O le avafatafata, ma le vafealoai. Mea la lea..

Upu na faatonuina e le Fofoga Fetalai e aveese mai saunoaga a le sui usufono mo Faleata Sisifo - *[O le faamai lea ma le... e le i oo mai le faamai lea e tatou te vevesi ai i le lalolagi, ae o le faamai pito sili lea ua lofia ai le tele o le atunu i le taimi lenei, e lavea ai ma le sui usufono lea o Vaimauga faatoa uma atu. Mo le faamai lea o le popole ma le atuatuvale, mo le stress. Mo le mental ona o le tele o le faaletonu lea ua i ai nai isi o tagata ma o latou mafatiaga i lenei foi taimi.]*

Tofa Olo Fiti Afoa Vaai: Lau Afioga...

Afioga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: Lau Afioga i le Fofoga Fetalai...

SUI FOFOGA FETALAI: Ia, se i tulai mai le Taitai o le Maota.

**Afioga Hon Tuilaepa Auelua Fatialofa Lupesoliai Lolofietele Neioti
Aiono Galumalemana Dr Sailele Malielegaoi:**

O le faamai lea o le stress, o le isi mea e mafua ai o le popole. Ae o le sailiiliga aua e i ai foi ia le faamai o le mafaufau. O le sailiiliga la a latou ia o faamai faapitoa, i le gasegase lea o le stress, o lea e masani ona omai ai ia fomai mai Niu Sila. E omai e fesoasoani ia Samoa, pe a oo i le taimi o mea nei o mafatiaga. Tai pei foi o le taimi na agi ai ia le tsunami, oso ai le tsunami. Toe omai foi i le taimi e tupu ai ia afa. O le mafuaaga lena o lea ou te malamalama ai i le mea lea. Ona o atu loa lea ia te au matou talatalanoa, i le latou galuega tele o lo o fai.

O le uiga o le manatu, e le o agai le saunoaga a le sui usufono na saunoa nei le Afioga ia Leala, i se isi o lo o agai i le mea e tupu i le atunu pe a oo i le taimi faapenei o faalavelave. Popole ae afua lava i le popole. Ma e o le popole, e i ai le lauga a le isi faifeau, i le Tusi Paia, na ou faitau ai. Fai mai le manatu o le faifeau, o le popole, o le mea lena a le tiapolo. Ae o le tagata lava ia e faatuatua i le Atua e le popole.

Ae o le tulaga lea i le stress po o le popole lea e aafia ai le toatele, e lavea uma ai lava tagata uma, e i ai ia latou responsibilities. O lona uiga o.... aemaise lava mea nei o matai sao o aiga, e agai uma atu lava i ai faafitauli, tausiga o le aiga, o lea faalavelave, o lea faalavelave. E tasoo loa faalavelave, vaai atu i le matai, ua tau faaletonu. E lavea uma ai lava tatou uma, ona o tiute ma tofi ia e tatou te tauaveina.

O upu la a fomai ia i le matou talanoaga, o tagata uma lava e i ai le mea lea o le popole, e aafia. Ma e..ona tupu loa lea o le stress. O le eseesege la o le stress ma le tele o faamai, it's a silent killer. Te i lava ua uma lou soifua. E leaga ua aafia uma totoga o lou tino, ae e te le o iloa.

Lau Afioga i le Fofoga Fatalai e... o le ala foi la lena o isi e agai i le aafia o le mafaufau. E taua la le mea lea sa aumai e le sui usufono. E manatua o le tasi lea o mea o lea e molia ai le sese o faaiuga a isi ma manatu, o tagata e faaletonu le mafaufau e faavalevalea. Ia ona ave loa lea tuu i uta i Tafaigata lea sa... o le tasi na o mataupu sa moliai moliai ai le Malo e se tasi foi o alo o Samoa mai Niu Sila sa oso le mai, ma ave ai lea i uta. Ona o le tele lava o mea ia o le stress, e aafia uma ai le tino atoa aafia le mafaufau.

O isi la fofo, o le faigofie ia o le fofo, aua e eseese lava ia fautuaga a le toatele o fomai e faapitoa lava i le mataupu lea o le stress. O le fautuaga a le isi fomai. A e faalogo atu loa ua oso ae le stress, aemaise lava pe a tupu mai se faalavelave, ia pe e lafo foi se upu a se isi ia te oe, amata loa ona oso ae lou toto maualuga, mea uma lava o le tino, e te ono maua ai i le mea lea o le mai fatu. Ia ma e uma atu ai.

Lau Afioga i le Fofoga Fatalai, o le fautuaga la a le tagata lea, o le isi lea fofo taua. E te faalogo atu loa ua tau oso ae lou stress e nofo sao loa i lou nofoa, moeiini ou mata ma e mafaufau. Tasi lava le mea e focus i ai lou mafaufau o lau manava. A manava lava o ni au manava tetele lava se 10,

relax lou tino, tuu lelei ou lima i luga o le nofoa, tasi le minute pe lua minute, lau Afioga i le Fofoga Fetalai, ua uma ma lou stress.

E taua tele la le ituaiga fofo lea, i le Afioga ia Amituanai, ia ma lau Afioga i le Fofoga Fetalai. Ia, o si au faaopoopo atu lena, ina ne i te i ua mafatia ai le sui usufono o Vaimauga, ae e taua tele le mataupu lea e laga. Ae o le tulaga lena, stress is a silent killer. Tele tagata na ona oso lava mai... faapea loa laia, o, o le momu, o le momu a foi ulaula... Ia ona tau ai lava lea o isi mau momu, ae o le faigofie ia. O lou popole, ua lua vaiaso o la e nofo lou toalua i o ae o lea e te nofo atu i i ua leva ona faatali. Lau Afioga i le Fofoga Fetalai, tasi lena mea e oso ai le stress, manuia le tatou Fono.

Afioga Sulamanaia Fetaiai Tauiliili Tuivasa: Lau Afioga i le Fofoga Fetalai, ou te fia tautala laitiiti lava.

SUI FOFOGA FETALAI: Malie sui usufono e alaala mai i nofoaga se i fai atu se tala a le Fofoga Fetalai. Ua ou manatu e taitaiina lelei le tatou Fonotaga i tulaga sagatonu o le faatinoga o lauga. O lea ua maea ona saunoa le Taitai o le Malo i le tulaga foi o lea aafiaga o o tatou tagata. Ua ou manatu, o le a faamuta ai i i le mataupu lea ae o le a tuu atu le avanoa e faaaauai ai le saunoaga matagofie a le Afioga i le Minisita mo le Soifua Maloloina, ia ua toeitiiti foi maea lona taimi ae lavapapale pea tatou sui usufono, se i maea lelei nisi o mataupu o lo o totoe ona tulai lea e fai so outou finagalo e tusa o le saunoaga matagofie a le Minisita mo le Soifua Maloloina.

Susuga Hon Laauli Polataivao Leuatea: Lau Afioga i le Fofoga Fetalai, i le ava ma le faaaloalo ona o lea ua faaiiuu saunoaga a le Minisita, o se mataupu sa laga i lau lauga.

SUI FOFOGA FETALAI: Ia, o le a tuu atu le avanoa i le sui usufono mo Gagaifomauga Nu.3.

Susuga Hon Laauli Polataivao Leuatea: Ou te le taea le... Faafetai. E le oo sou lagona i le stress because I'm a stress free man. Ioe. Ae na ona ou faafetai atu i lau Afioga i le Minisita, sa olo lava le fua ma faalogologo ma le totoa. Malo. Ua faafogofa foi Samoa i lou tulai mai i taimi o faafitauli, faafetai atu. E leai lava se lagona e sili atu i lena. Faamalo foi i le Matagaluega, e le faigofie lo outou alofaiva. Ua tatou mua i afa, tuaoi ma afa ma isi mau mea eseese. Ae na ona ou faamanatu lava i si mataupu lea sa ou tatalo atu ai lau Afioga i le Tamaitai Minisita, o lou malosiaga o lau aufaigaluega, lea na ou tuualalo atu ai silasila ane po o alauni ea po o totogi o si au aufaigaluega. E te tua lava i alii fomai, tamaitai tausimai ia ma lau aufaigaluega. Na ona ou faapena atu, silasila ifo i ai leaga o lea sa fatagisia o latou totogi ma alauni. E tuu atu i ou tafatafa, ona o lea ua ou vaai i le pepa

o lea ua e saunoa manino i auala malamalama leaga o le Maota sa fai atu ai lau upu. Ma lou agaga faaaloalo...

Afioga Afoa Amituanai Faleulu Mauli (Palauli Sisifo): Lau Afioga i le Fofoga Fetalai...

SUI FOFOGA FETALAI: Faafetai mo le saunoaga a le sui usufono mamalu. Talu ai o lea ua... malie le sui usufono alaala mai i lalo. Talu ai o lea ua tatou taunu i le tatou malologa masani o le taeao. Ma o lea ou te manatu o le a tali le Afioga i le Minisita e tusa o le finagalo o le sui usufono mamalu faatoa maea ona saunoa.

Ou te faasilasila atu ua faataatiae Galuega a le Maota mo lana malologa masani mo le 15 minute.

Na faataatiae Galuega a le Fono Aoao mo lana malologa masani i le itula e 10:43 i le taeao ma toe amatalia i le itula e 11:30 i le taeao.

Na toe faaaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.3) 2019/2020 ma le Tulafono Tau Faaofi o le Faatatauina o Tupe 2020/2021.

SUI FOFOGA FETALAI: Ou te faasilasila atu ua toe amatalia nei Taulumaga ma Galuega a le Fono Aoao Faitulafono.

Ia ua i ai foi le lagona ua maua se faasiligamalosi i le taumafagati a le Maota aua le faaaauauina o le tatou galuega i lenei taeao.

E faataatiae Taulumaga o le Fono Aoao o saunoa le Afioga i le Minisita mo le Soifua Maloloina. Ae i ai le manatu o le a tuuina atu le avanoa e saunoa ai le sui usufono mo Palauli Sisifo ona tali lea o le Afioga i le Minisita, e pei ona saunoa foi le sui usufono mamalu o le Gagaifomauga Nu.3.

Tulai mai le sui usufono mamalu.

Afioga Afoa Amituanai Faleulu Mauli: Faafetai i lau Afioga i le Fofoga Fetalai mo le avanoa. Ou te le i iloa po o ai tonu lea sa faasino i ai le saunoaga a le Palemia po o Amituanai, po o Afoa Amituanai e uiga i le stress a. Aua o Afoa Amituanai, o le matua leai lava ma se stress e tasi o i ai i le taimi lenei, e matua stress free lava. Ae fia tulai atu e faafetai i le tatou Minisita o le Soifua Maloloina faapea foi le aufaigaluega i le latou galulue punouai i lenei vaitaimi. Ou te talitonu a outou silasila i le lauga a Afoa Amituanai i le taimi ua tuanai i le last sitting, e tele lava lau faafetai ma lau faamalo i le Minisita ma le aufaigaluega. E le o se galuega faigofie, o le matua faigata

lava. Ae faamalulu atu foi i le Minisita pe a faapea sa i ai se tulaga sa tetena ai lona finagalo i lau lauga lea ua tuanai atu. Leai, o Afoa, e na o upu moni ma mea faamaoni ou te tautala ai i le Maota lenei, ou te le avatua ni mea pepelo po o ni tala salatua i totonu o le Maota lenei, leaga o lea ou te manatuaina lau tautoga, na o mea lelei aemaise mea e puipui ai lo tatou atunu, aemaise o tatou fanau, tagata uma o le tatou atunu. O le mea la lena, e faamalulu atu i le Minisita, e leai. O le Minisita foi, pei se tuafafine ia te au leaga na ma ola faatasi mai i Sinamoga i le mea foi lele e tau o le lulu o le aoa, o i ina na ma mafuta ai ma le Minisita. Na pau si ona lave, ua leai se aoa ua tafea, sola ma le lulu ae o la e ua leai se mea. Avea lenei taimi ou te talosaga atu ai i le Siosiomaga, se faamolemole sue mai se isi aoa laitiiti foi lele e faatu i ina i Sinamoga ina ia tumau ai pea le aganuu lea i Sinamoga, o le lulu o le aoa. Ou te manatuaina lava le Minisita o se teine lalelei tele i le vaitaimi lena a o matou laiti, a o faigaluega i le 2AP o le number 1 lava lea i mea tau announcer. E le maua e se isi. Ana ou award ina le gold medal, e maua e le Minisita le gold medal. O le mea la lena, e le mafai ona ou faia se tulaga e aafia ai le Minisita. Na ona o le tuualalo atu i lau Afioga i mea e fesoasoani ai i lau matata, aua o le tele o fautuaga ia e avatu, e i ai fautuaga o lena e faaletonu. O le tulaga la lena e alu atu ai Afoa Amituanai e tuualalo atu i lau Afioga faapea foi le Afioga i le Palemia.

Aua o lea foi na saunoa le Palemia i le mea foi lele o le manava i totonu manava i fafo. A faapea e te manao e stress free, nofo i lalo, 10 au manava e toe sau stress free. A o Afoa, ua ou le toe stress, o la e ua ou manao e ave uma lava au pisinisi ua uma ona fai le bond i si au fanau, o la e ua carry e latou pisinisi, a o lea ua concentrate lava Afoa i le tatou polokiki. O le tulaga la lena, ua ou le toe stress. O le tulaga foi lea, e leai ma sau aitalafu i le NPF.

SUI FOFOGA FETALAI: Malie le sui usufono mo Palauli Sisifo, se i tuu atu lava le avanoa i le Minisita mo Tagata Tafafao Maimoa Mai Fafo.

Afioga Hon Sala Fata Pinati (Minisita mo Tagata Tafafao Maimoa Mai Fafo): Faafetai i le avanoa. E faamalulu atu i lau Afioga i le Fofoga Fatalai, ae a pe a faaopoopo se 10 minute i le lauga a le sui usufono?

SUI FOFOGA FETALAI: E lelei ona ou fautuaina le Maota, o le faauilavea, o le mea e fia faamalamalama ae le o se lauga e ono toe faaopoopo ai ni minute. Ia saunoa le sui usufono.

Afioga Afoa Amituanai Faleulu Mauli: Faafetai. E peiseai o le tulaga lena lea sa ou lauga atu ai i le taimi muamua, aveese tou mask. Na pau lava tagata e fai mask na o mea foi ia o fomai e protect ai le tagata lea e fai le operation, i te i ua mafatua i ai se isi ma infect ai le... ma tagata o la e mamai,

you know e isolate ai latou ia puipuia ai o latou aiga ma mea faapena. So o lea ou te tilotilo atu, e feololo lava le au mamai lea e i totonu o le tatou...

SUI FOFOGA FETALAI: Malie le sui usufono mo Palauli Sisifo se i tuu atu le avanoa i le Afioga i le Minisita mo Faatoaga.

Tofa Hon Lopao Natanielu Mua (Minisita mo Faatoaga ma Faigafaiva): Lau Afioga i le Fofoga Fatalai, ou te toe faafesili atu lava i lau Afioga, o le mea ea o le a toe amata lauga a le itu le la o lea... Na pau lava le mea, o la e sau le tatou SOE, e faamalosia le wear ina o le mask. O lona uiga la o oe le isi tagata le malamalamama lea e i ai nei. Faafetai. Ma le faaaloalo.

SUI FOFOGA FETALAI: Faafetai mo le saunoaga a lau Afioga i le Minisita. Leai o lea lava e aafia lava i le tau faamalamalamaina o lona finagalo e pei ona taea i lana lauga. Ae faamaea mai loa lau faauilavea.

Afioga Afoa Amituanai Paleulu Mauli: Faafetai i le finagalo malamalamama o lau Afioga. E manaia lava aua o le ituaiga mataupu nei fai mai le Afioga i le Palemia, e complex, very complex. A o lea ou te fai atu, very simple to Afoa, very simple, it's a simple subject pe a faapea o la e ua faamanuinaina mai e le Atua ma tuuina mai e le Atua lea tatou te tatalo i ai le tulaga foi lea o le fofo o faafitauli nei. O ai a tagata popoto o le lalolagi, ua matua paso lava, ae faafetai o lea ua musumusuina Afoa e le tatou Tama oi le lagi e avatu le fofo lea i se taimi, e le gata ina open ai le economy o Amerika, aua e tatau ona open ai le economy o Amerika...

SUI FOFOGA FETALAI: Faafetai ua maua. O lea ua faafogfa atu le Afioga i le Minisita, malo le tofa. Ae faamaea mai le faauilavea i mataupu o lo o fia malamalamama i ai.

Afioga Afoa Amituanai Paleulu Mauli: O lea sa faauilavea mai foi le Afioga i le Fomai faapea foi le Minisita o Tupe i le taimi ua tuanai, fai mai, o lo o tatalo i le Atua ia foai mai le fofo, o le tui, vaccine ina ia mafai ona foia ai le faafitauli lea. Na pau lava si ou... ou te faanoanoa e faasilasila atu i lau Afioga i le Fomai, e le talia e le Atua a outou tatalo e aumai se vaccine. Aisea? Leaga foi o le vaccine lena e...

Afioga Hon Tuitama Talalelei Tuitama (Minisita mo Tina ma Tamaitai, Atinae o Nuu ma Afioaga ma Agafesootai): Lau Afioga i le Fofoga Fatalai...

SUI FOFOGA FETALAI: Ia, ua ou manatu ua muta le avanoa na tuuina atu i le sui usufono mammalu leaga o lea o le a agai i nisi mataupu e le i aafia i lau saunoaga.

Ia se i tulai mai le Afioga i le Minisita mo Tina ma Tamaitai, Atinae o Nuu ma Afioaga ma Agafesootai:

Afioga Hon Tuitama Talalelei Tuitama: Ia leaga o lea sa taua au i le saunoaga a le sui usufono. E ui lava ina e ese le agiagi a le sui usufono foi i lenei taeao, ma e faafetai o lea e faatagaina pea e lau Afioga le lauga faalua a le sui usufono, ae tatau ona faasao le mataupu lea. E le o se tala e faatupu e au foi le tala lea ou te fai atu ai, o tala nei, o tala e afua mai i suesuega ma sailiiliga e saienisi o lo o faagasolo aua le faamoemoe lea. E pei lava ona ou taumafai e faamalamalama atu i le taimi ua mavae, o le corona virus lea po o le Covid-19, o le siama e fou, e le o se siama tuai. E i ai corona viruses muamua sa maua i isi ituaiga corona viruses, ae na o mea o pusi foi ia sa maua ai, sa maua ai la faamai ia o le peritonitis ma le leukemia i mea o pusi (cats). Ia sa taumafai foi la e saili se vaifofo, ma o lea sa manatu atonu e aoga foi vailaau na sa faaaaoga e togafiti ai pusi na, e ono aoga i le virus lea. Peitai, i le sailiiliga a saienisi, e ese mamao le corona virus lena, ese foi le corona virus lea e mafua ai le faamai lea o le Covid-19. O le ala la lea o le le faaaaogaina o vailaau na sa faaaaoga i lena taimi e pei o le retromad1 sa faaaaoga i Singapore ma Indonesia e taumafai e togafiti ai mea ia o leukemia ma mea ia o peritonitis i pusi. A o le taimi nei la, o la ua faagasolo sailiiliga a fomai ma saienisi e saili se vaccine sao lava e talafeagai i le faamai lea o le Covid-19. Ma atonu la e alu alu, pau lena o le faamoemoe o Samoa e malupuipuia ai Samoa e aunoa ma le oo mai o le faamai, ma o le tala sao le tala lea, e le o se tala faatupu. Aua afai ae maua le vaccine ae le i oo mai le faamai i inei i Samoa, ua mafai la ona puipuia i tatou.

I le sasao o le misela lea na sasao ai nei, ia, o lea sa taofia uma galuega a le Malo ae agai le aufagaluega a le Malo e fai tui puipuia. Vaai i le vave ona tali mai o le taumafaiga lena, o lea lava ua mafai ona uma lelei le misela lea ua leai ma se misela e toe tulai mai ona o lea ua maua le immunity po o le protection a Samoa mai le vaccine lea o le misela lea sa faagasolo ai tui.

O le agaga foi la o lea e i ai nei le tatou atunu, a maua mai le vaccine lea, o le a mafai ona puipuia uma lava tatou. Po o le a lava le taimi e toe omai ai tagata ma le faamai i Samoa nei, tatou te le toe maua ai, aua foi o lea ua puipuia tatou mai le faamai lea. Ae afai e oo mai i le taimi nei e leai ma se puipuiga o tatou o i ai, ia, o lea tatou te faalogologo i tala e aumai, e le o ni tala foi e faatupu e le au tusitala, e au i le 1,000 tagata e maliliu i le aso e tasi. A tupu le mea lena i Samoa nei, e mafai e se isi ona... e mafai, e toe pei le soifuaga o Samoa lea tatou te i ai nei i se taimi faapena ae oo atu taeao ua faapea mai, o e ua maliliu i le 24 itula ua tuanai nei, e 1,200, o le isi aso e 500, o le isi aso e 600. Ia vaai o le numera o tagata maliliu i Amerika o lea

ua 120,000, toeitiiti maua le population o Samoa. Ia afai la e oo mai se tulaga faapena i Samoa ae maliliu se 120,000 tagata, e mafai e Samoa ona tali? Ia faapenei ua gaogao uma auala o Samoa, ua leai se isi e toe fealuai ma ua leai nisi ua maliliu uma.

O le ala la lea, e le faataaloga pe faa-ataata lafoga ni tala e fai i totonu o le Maota lenei, o tala e fai ma le amiontonu ma tala e fai ma le agaga malualuga ina ia fesoasoani i le tapenaga ma le taumafaiga a Samoa o lo o fai nei e puipuia mai le tatou atunu mai le oo mai o le mala lea.

Ia o lau tu atu lea lau Afioga i le Fofoga Fatalai e faamalamalama le mataupu lea, leaga o lea foi o le a toe agai i ai sui usufono lea. Ia manuia le Fono.

SUI FOFOGA FATALAI: Faafetai. Malie le sui usufono ua manino ma malamalamalama le mataupu e pei ona e tulai mai ai.

Ou te tapa lau Afioga i le Minisita mo le Soifua Maloloina e te saunoa e tusa o finagalo faaalia.

Tofa Namulaulu Sami Leota (Faasaleleaga Nu.2): Lau Afioga i le Fofoga Fatalai, o sina avanoa puupuu lava lea faamolemole.

SUI FOFOGA FATALAI: O se mea e fia faasao po o se mea e fia malamalamalama?

Tofa Namulaulu Sami Leota: E fia malamalamalama ai lau Afioga, o lea foi sa tuu atu...

SUI FOFOGA FATALAI: O le a tuu atu le avanoa i le sui usufono mamalu mo Faasaleleaga Nu.2.

Tofa Namulaulu Sami Leota: Faafetai. E puupuu lava. Ia o lea ua matau atu o lea o le a seu i fanua le folasaga matagofie a le Afioga i le Tamaitai Minisita. Na o lou fia pai lava i le tulaga o le falemai lea i Tuasivi, aua o lea sa afea foi i le amataga. E momoli le faafetai tele, talu lava ona agai atu fomai i tua ua matua maualuga le tulaga o i ai le tautua po o le service foi a fomai o lo o i ai. E le gata foi i le Afioga ia Fuimaono Aleki o lo o taitaia aemaise foi nisi o fomai o lo o i ai pei o Junior Posini ma i latou. O le tulaga foi lea, o le tele lava o taotoga ua mafai ona fai i Tuasivi, o lo o agai atu i ai, e le gata i le atu Faasaleleaga, a o le usoga atoa. A o lea ua maua tala foi lea o lea o le a toe agai mai i Apia le susuga ia Fuimaono. Na pau lava le talosaga foi lea ia tumau ai pea le... pe a toe agai atu ai foi se isi fomai e faapena ona faaaauau ai pea le tautua lea. E le fia faalavlave i tofiga o i ai pe a faapea o le a toe agai mai i Apia, ae momoli atu le faafetai tele. Ua matua fiafia lava le tatou motu tele i le tulaga ua i ai le maualuga o le agai atu i le falemai o

Tuasivi, o i ina foi o lo o tele ina agai atu ma faigaluega ai nisi o le matou itumalo. Ae momoli atu le faafetai tele lava, ia pau lava le mea ia tatou vaavaai foi i le tulaga lea lau Afioga i le Tamaitai Minisita. Ma lou faaaloalo faafetai.

SUI FOFOGA FETALAI: Ou te tapa lau Afioga i le Minisita e te saunoa e tusa ai o mataupu laga e sui usufono.

Tofa Hon FAIMALOTOA KIKA IEMAIMA STOWERS: Faafetai i lau Afioga i le Fofoga Fatalai, faafetai foi le talimalo i le Maota nei i le tatou malologa faatasi ai ma lau aufaigaluega i le faamalositino.

O lena ua maea ona saunoa le Afioga i le mataupu foi i le popole ma le atuatuvalo, ia, e le toe faia i ai se faamatalaga. Ae na ona faamanatu, o lo o aafia uma atu vaega ia i tapenapenaga ma polokalame o lo o faapena ona faagasolo atu a le Matagaluega ina ia tapenapena le atunuu aua ne i panic, aua ne i popole. Ia afai o le a le uiga o le popole ma le atuatuvalo lea sa taua, ia o tulaga uma na. Ae na ona ou faamanatu i le sui usufono, e faavae i le Atua Samoa, o Iesu o le tali o mea uma. Toaga e tatalo ma tatou tuu o tatou manaoga i le Atua i taimi uma. E faamalulu atu i le sui usufono mamalu e pei ona saunoa, Laauli, e moni o lea lava e i totonus o au notes a ua misi i lau vaai, ae ona o le tele o le faalavelave o le vaega lea.

Ae o mea o ovataimi, o la e faafogofoga mai le Matagaluga, ou te talitonu ua maea ona totogi ovataimi, ua maea foi ona ou siakia i le Ofisa ma i latou o lo o faia pepa mo totogi, aua sa aumai ai foi le fautuaga a le Ofisa o Tupe i nisi foi o pepa po o submissions na tuuina atu mo isi mea tau soifua maloloina, sa aumai ai le fautuaga e ave le faamuamua e totogi atu ni faamanuiaga tuua po o ni ovataimi o i ai mo le Matagaluega, ma sa ou valaau i le Matagaluega ua maea ona faatino ia tulaga uma. Afai o faafogafoga mai le Matagaluega o lo o i ai ni mea faapea, o lo o fono le tatou Matagaluega i le tele o taimi, tai 3 i le vaiaso management ma isi fono, ia faailoa mai pe a faapea e i ai ni mea faapea o tupu, e le mafai ona iloa pe a faapea e le o faailoa mai. O le tulaga lena.

Ona toe oo mai ai lea, e faamalulu atu i le sui usufono mamalu mo Palauli Sisifo, ia congratulations, o lea ua faailoa mai o lena ua e stress free. Malo. Ae pau o lea, na mafua ona ou faalavelave i lena foi po, ona e pei lava ona e toe saunoa nei foi, na o upu moni ma mea faamaoni o lo o e saunoa i ai. Ae pau le mea na ou popole ai, ua faaluafesasi lau faamaoni lea ma mea moni ma talaiga faale-soifua maloloina o lo o gapatia ai, aemaise o le Maota nei, le Malo, le Komiti, i le taumafai atu e faamalamalama le atunuu, o i ina...

Afioga Afoa Amituanai Faleulu Mauli: Lau Afioga i le Fofoga Fatalai...

SUI FOFOGA FETALAI: Le sui usufono mamalu e i ai se mea e te fia saunoa ai address mai i le Nofoa?

Afioga Afoa Amituanai Faleulu Mauli: Ioe faamolemole leaga o lea e i ai se mataupu e fia faamalamalama, aemaise o le ua toe taea mai e le Minisita tulaga ia sa ou taua faamolemole lau Afioga.

SUI FOFOGA FETALAI: E le i maea le saunoaga a le Minisita o lo o faamanino ai tulaga ia e te atugalu ai lea sa e saunoa nei i ai i le taeao.

Afioga Afoa Amituanai Faleulu Mauli: Toe tuu tasi mai lava lau Afioga, o se tamai vala lava lea e fia...

SUI FOFOGA FETALAI: Ia se i saunoa? E manumanu tele i le faafogfa mai a le itumalo.

Afioga Afoa Amituanai Faleulu Mauli: E pei ona ou taua muamua i le saunoaga foi a le Fomai, e le mafai ona tatou faatalitali i se tui po o le vaccine e vaccine ai tatou. O lau fautuaga, e le tatau ona aumaia se vaccine e tui ai tatou i Samoa. E 20 tausaga ua tuanai o lo o taumafai fomai o le lalolagi e sue se vaccine e fofo ai ituaiga flu na e 7. O le taimi nei e leai se mea. O le mea lea e taumafai e sue mai se vaccine...

SUI FOFOGA FETALAI: O lea ua maua, malie le sui usufono mamalu o lea ua maua atu e le Afioga i le Minisita lou finagalo i se mea laititi sa e fia faailoa, o lou lava lea finagalo, a o lea ua saunoa le Minisita i le tulaga o le faafogfa mai a le atunu aemaise le Maota lenei.

Ou te tapa lau Afioga i le Minisita e saunoa.

Tofa Hon FAIMALOTOA KIKA IEMAIMA STOWERS: Faafetai fesoasoani mai i lau Afioga i le Fofoga Fetalai. E le faataumatatao i se sui usufono mamalu leaga sa filifili mai le paia maualuga o le Maota lenei mai le mamalu o itumalo eseese. Na pau lena o le mea na ou faalavelave ai, aua ne i faaluafesasia se manatu po o se finagalo o se toatasi ma galuega lelei e tele o lo o gapatia ai le Malo, le Maota lenei ma le toatele o le aufaigaluega aemaise o lenei Matagaluega o lo o taumafai e talai atu ma faamalamalama si o tatou atunu i vaega uma e tatau ona tapenapena ma puipui, a o sao mai le siama, a ua leai so tatou popole ma se...

O lona lua o mea na ou faalavelave ai i lena po e pei ona saunoa lau Afioga, ou te manumanu i le faafogfa mai a Samoa, o le Maota lenei o le Maota o le Fono Sili a le atunu. Na lagona lou faanoanoa ona o la e faafogfa mai le atunu e faatonu mai le Fofoga Fetalai ae pei ua atagia ua faatonu atu e

sui usufono mamalu le Fofoga Fatalai. Pau lena o le lagona sa oo mai ia te au na mafua ai ona ou tulai, a o au e tumu i le faaaloalo ma le avafatafata.

Faafetai foi mo le sui usufono e pei ona saunoa le Afioga ia Namulaunu e tusa ai o le falemai i Tuasivi. Ia o le tulaga lava lena, o lo o taumafai atu i le mea e aupito sili ona fai ina ia faapena ona faamalie atu ma talimanao i vaega eseese o le tatou atunuu. E pei foi ona talosaga mo le susuga i le alii fomai ia Fuimaono Aleki. Ia atonu o lea foi e faafogafoga mai le... o Fuimaono atonu o ia lea o le Chief Surgeon, e fealuai faapea Fuimaono. A tele mai... e pei lava ona silafia o la e ua fai taotoga i Savaii, o le taumafaiga malosi foi lena ma le uunai a le Matagaluega ina ia mafai ona procure mai, aumai i totonu meafaigaluega ma masini manaomia e fomai e faatino ai le galuega lea. Ia, e faapena ona fetuunai fomai mai lea taimi ma lea taimi e fua i le pisi ma le manaoga o lo o tulai mai i lea falemai ma lea falemai, aemaise lava Mooootua ma Tuasivi e i ai i latou faapitoa mo tulaga ia. Ae faafetai pe afai ua faamalieina foi se silasila aua le tatou falemai tele lea i Tuasivi.

E tele lava nisi o mea, ae o fuafuaga ma polokalame ua faataatitia nei e le Matagaluega mo le agai i luma, peitai ou te toe fia faatepa le mamalu o le Maota ma le faafofogaaga a Samoa i le taimi o le pepesi malosi mai o le misela i le taufaaiuiuga o le tausaga na tea nei 2019. Ona avatu ai lea o se talosaga i se tasi foi o polokalame o lo o nofo popole i ai le Matagaluega i le taimi nei ae e ao pea ona malamalamala i mea sa feagai ma toatuga ina ia faamalamalamala atili le mamalu o si o tatou atunuu ina ia aua aua ne i toe tupu mai se isi faamai ogaoga faapenei e ono toe pagatia ai Samoa i le lumana.

Lau Afioga i le Fofoga Fatalai, a o tatou i ai pea i tulaga le mautonu ona e le o faaitiitia lava le agai pea i luga o le fuainumera o e ua aafia ma e ua maliliu i le Koviti-19, ua manatu le Matagaluega o le Soifua Maloloina, ua alagatatau ona tatou toe galulue faatasi ina ia uunai malosi le faia o le tele o isi tui puipui ua manaomia ona faatino e puipuia mai ai alo ma fanau uma o le atunuu mai le tele o isi faamai pepesi e pei o le tui puipui mo le puipuia o le fatafata vaivai, le tui puipui e puipuia ai le ate fefete, o le lipi, le tui puipui o le ona, o le tale vivini, faamai pipili, o le fiva faiai ma le tuaula, o le niumonia, o le fiva taifoi ma le tele o isi faamai ia ua faapena ona popole agai i ai le Matagaluega e pei lava ona faataatia e le Malo, e le toe manaomia le tatou toe oo i se mea faapea. Ona o lea foi lava tatou te faalogologo ma vaavaai i alaata ma faasalalauga mai fafo i le feleleai o siama eseese ma vairusi i le tele o atunuu o le lalolagi. O le tauloto lava ua tatou masani ai i le gagana faale-soifua maloloina, “E sili le puipuia i lo le togafitia.”

Ua mafua ona manatu e toe faatepa i lea tulaga i le taimi o le misela ua tuanai atu nei lau Afioga i le Fofoga Fatalai, ona i le maea ai o le misela, e latalata i le 6,000. E 5,700 i latou na aafia, ae pei ona silafia e 83 na maliliu e matele i nai fanau iti mai le faitauaofai o le atunuu e 200,800+. O mafuaaga na tulai mai i le misela, e tele luitau na feagai ai ma le atunuu.

1. O le tilotilo i ai sa faaletonu tele le tulaga maualalo sa i ai le tatou tui puipui, low vaccination coverage. O le tasi lena, o le tilotilo i ai i mafuaaga ma luitai sa tulai mai. Faatasi ma le tatou talitonuga faale-atunu i mai o tamaiti e pei sa lilifa ai le tele o matua ma e vaaia fanau, e avatu nai a tatou fanau i a tatou fofo faasamo. E le melea la lea itu, ua tatou vaai uma i le aoga foi o tatou fofo Samoa i le tele o nisi o taimi, ae ave pea le faamuamua. Atoa ai ma le tulaga... na ou ola mai lava au ia o ou vaai pea, sa tuu saoloto ma tuu i le faitalia o matua pe ave fanau e tui pe leai. E le gata i lea sa i ai le faalavelave lea na... o le tausaga la e 2017 i lou alu atu ou tilotilo i fuainumera ma faamaumauga, na oo ai le faiga o tui puipui nei i le 74% le maualuga o le faatinoina o le tui puipui, ae na toe pau maualalo i le 2018, ona o le faalavelave lea na tupu mai i si o matou falemai itumalo i si o matou nuu i Safotu, lea na maliliu ai nai fanau iti se toa-lua i le maea ai ona faatino tui puipui ia. Ma o i ina na toe taofia ai foi mo se taimi umi, ae na faatonuina ai e le Malo le faia o se Komiti suesue, se i sailiili le mafuaaga mautinoa, o le maliliu ai o tamaiti nei, pe na lelei ona fai tui pe na lelei ona sui pe na lelei ona teu malu, ma mea uma lava faapena, na aofia i suesuega, ma na faaumiumi ai le taofia o lena. O le taunuuga o ia mea, o lea na toe tautino ai lava e tamaitai tausi soifua lo la sese. Na sese le vailaau sa sui ai tui nei. O le toe taumafai atu o le Matagaluega e toe lalaga le toe faatinoina o tui puipui ia Fepuari lea na tea nei, ua le faatuatuaina e le toatele o tagata. Ua tele ina manatu ua sili ai ona o e fofo.

Tofa Olo Fiti Afoa Vaai: Lau Afioga i le Fofoga Fetalai, na o sina mea lava lea e fia faasao lau Afioga. Ia sa i ai lava le manatu lau Afioga i le Fofoga Fetalai o le a le toe aloa lou sa i tua, i le tulaga e pei ona i ai le faamai lea. O lea lava e faafofoga le atunu, pe sao pe sese, sao fomai pe sese fomai, sao le tina pe sese le tina, ae sa tatau lava ona fai se suesuega faapitoa ina ia record uma mea faapea, aua le agai i luma. Peitai ane o lea ua e toe alo i tua lou sa, o le popolega lena. O le mea foi e fia faasao atu lau Afioga i le Fetalai lau Afioga foi i le Tamaitai Minisita, ou te le auai i lou finagalo e faapea, o aso ia sa tuu lava i tina pe aumai a latou fanau e tui pe leai. I le taimi o lelei le faagasologa o le Komiti Tumama a tina, e compulsory mea na. E leai lava ma se isi, e tatau ona tui uma lava fanau i le taimi lena. Ae pei a toe lagalaga atu nai manatu ona ua e toe alo fua i tua lou sa. Aefafetai mo lou avanoa lau Afioga i le fofoga Fetalai.

SUI FOFOGA FETALAI: Faafetai mo le fautuaga. Saunoa lau Afioga i le Minisita.

Tofa Hon FAIMALOTOA KIKA IEMAIMA STOWERS: Lau Afioga i le Fofoga Fetalai, na mafua ona ou toe lalaga mai le mea na tupu i le tausaga e le i leva atu, i le tausaga lea na tea nei i le tau faaiuiuga. O lea e le i afa le

tausaga, ona e fesootai ma aiga lelei le taumafaiga lea ua faataatia e le Malo, e ala atu i le Matagaluega mo le tatai o le atunu i le tulaga e a o ona i ai. E pei o le tulaga lena o le toe faamanatu, aua a malamalama si o tatou atunu, e fiafia i lagolago ma opogi ia fuafuaga faataatitia a le Malo. E pei lava ona ou fai atu i le taimi ua sola, e le mo se tagata se toatasí ae mo le manuia lautele o Samoa. E le o i ai foi ni faamaumauga o i ai, e tusa ai o lea sa ou fai atu, na ou sailiili i mea sa i ai. O le 20... na toe taumafai mai, 2017 lea na toe... ae i le faatusatusa la o tatou, 74% i isi atunu o le pasefika, 99%, e pei o le mea lena. Ina ia faafofoga mai Samoa, aua aua ne i toe tupu mai le ogaoga o mafatiaga na feagai ma i tatou i le misela. Tele tulaga e pei ona tatou vaia. Sa i ai foi nisi o le matou aufaigaluega na matauina, e toatele foi tagata mai fafo na tetee i tui puipui, le au anti-vaxxer ua tatai atu ai ma finagalo o isi tagata e lagolago la lea tulaga. O le taimi lena o Fepuari lea na tea nei, e pei lava ona ou fai atu i le taimi ua sola, e le i mautu ma malosi le auivi o le Matagaluegai le tulaga tau i le public health, sa tuai ona faatino ona sa faia foi le Komisi suesue faapitoa i le Organisation Structure mo le Matagaluega fou a le MOH po o le Matagaluega o le Soifua Maloloina. Pei o tulaga la ia, tatou te aoao mai mea sa tutupu tatou te poupou ma tatou faia ai ni faiga faavae mo le tatou agai i luma. O lena e silafia le galuega tele sa feagai ma le Malo, e tusa la e 2 ia Komisi suesue i le taua la o le Komisi suesue e toe suesue nei mea. I lau tilotilo i ai, oka le mau Komisi suesue, a o mea ia na tutupu tatou te malamalama ai, o lea tatou te malamalama lelei lava. E maualalo le... ae tatou aoao mai la, fai, faataatia fuafuaga ma faiga faavae mo le agai i luma. I le naunautaiga lea o le Malo ia aua ne i toe tupu mai se mea faapea. E feagai le Malo ma le tele o... aapa atu loa le Malo faatino le Poloaiga o Faalavelave Tutupu Faafuasei. Ma o le taimi muamua lea i Tala Faasolopito o Samoa, ua faia ai poloaiga nei, i se faamai. Sa na o afia ma lologa ma isi faalavelave faale-natura sa faatino ai. Sa aumaia e le Malo fesoasoani uma talafeagai....

SUI FOFOGA FETALAI: Malie le Afioga i le Minisita, se i tulai mai le Taitai o le Maota.

Susuga Hon Tuilaepa Auelua Fatialofa Luplesoliai Lolofietele Neioti Aiono Galumalemana Dr. Sailele Malielegaoi: Se i faafesili atu lava i le Minisita, i le tulaga lea na matauina i le toatele o i latou e le i gauai mai i polokalame a le Malo, mo le tui lea o le misela. O lea sa matua mataituina, masalo o le faaaliga lea e pito sili ona taua e 2 vaega. O tagata lale na o le le atoa le 5 minute o la e tu i tafatafa o le falemai, a o lea sa matauina le toatele o aiga, o la e nonofo lava i tafatafa o le falemai, ae faatoa aliali i le taimi lea na fai ai le tatou lockdown, ia ma o atu foi le tatou au-tui, tui lava i totonu o latou fale. Ae le gata i lena o le isi mea lea na tulai mai, e i ai isi anoano o aiga ia la e o atu le au-tui a le Malo o la e tutu mai taavale. O le faigofie ona

o mai e aumai i le falemai o lo o i ai auala, ma le Vaega 3 ua uma le polokalame o tuiga, ae asiiasi atu le Afioga i le Minisita o lo o nafa ma mataupu lotoifale, le afioga ia Tuitama faaalu le latou polokalame, ae toe maua mai le isi 200+ mai Savaii. E le i tui lava ona e i ai le agaga lena, e mulimulitui lava i le masani foi lea a tatou, e o e asiiasi i fofo e fofo ai a latou gasegase. E le i mulimultaia le anoano o le mau valaau atu a le falemai e o mai e tui. O le faafesili, o le a se vaaiga i le taimi lenei, ona o lea lava e toatele fanau e fananau i le tausaga. O lona uiga e manaomia ai lava le tui puipuia i le tulaga lea o le anoano o le mau mai, o tamaiti pe sili ea ma le 10 tui e tatau ona fai. O le a ea se tali mai o le tatou atunu, o i ai pea le agaga musua lea po o ua malamalama?

SUI FOFOGA FETALAI: Sei tulai mai lau Afioga i le Minisita mo le faamaninoina o le vala lea.

Tofa Hon FAIMALOTOA KIKA IEMAIMA STOWERS: Faafetai tele i lau Afioga i le Fofoga Fetalai, ae faafetai atu foi i le Palemia. Atonu o le auga lea ma le autu o le taumafai loa o le Matagaluega, leaga e moni ma faamaoni le saunoaga a le Palemia, i le tele o faafitauli ma taumafaiga, e tauologologo ae faataligatuli se i tulou lou gutu ma le afi. Ia nisi latou te le o faataua. Fai mai upu a le atunu, o au o matua fanau, ae toatele latou te le i faataua, ma ave le faamuamua i le puipuiga o alo ma fanau a Samoa, o Samoa lea mo a taeao. Tatou ave le faamuamua, aua a malolosi ma soifua maloloina lelei le atunu, ua matua atunu malosi. E malosi foi le tamaoaiga, leai ni popolega e pei ona tatou i ai, pe a lelei ona fuafua.

Susuga Hon Laauli Polataivao Leuatea: Lau Afioga i le Fofoga Fetalai, si mea laititi lava lea lau Afioga, leaga sa manatu foi i le tulaga lea, ma upu foi na fai atu i le mataupu lava lenei.

SUI FOFOGA FETALAI: Se i saunoa le sui mamalu mo Gagaifomauga Nu 3.

Susuga Hon Laauli Polataivao Leuatea: Faimalo e leai lava se agaga, e toe assaina le ogasami ua uma ona asa. Ua uma ona momoli atu a matou fautuaga i aao o lau afioga, ae pei ua toe fagufagu mai lava le mea lenei. O lea ua e saunoa manino i le tulaga sagatonu o le mataupu lenei. O lea foi ua e agai e saili fofo mo le lumanai. Lau Afioga i le Minisita, a i ai ni ou alofa, aua ne i tatou taumate, aua ne i o tatou tau fesili, po o le a le tatou mea la a fai. E 80 alo o le atunu ua fano, faamolemoe, fai se sailiiliga lelei, se Komisi suesue, ona manino lea o le malamalama o le mata, e le tatau ona tatou o tauaso. E tatau ona matua fai se sailiiliga lelei.

SUI FOFOGA FETALAI: Malie le sui usufono o saunoa...
Gagaifomauga Nu 3.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Minisita, ona o lea ua iloa o le afuaga o le maliliu o fanau, ona o le naunau e o e ave muamua e fofo, ae avatu i le falemai ua tuai. E malamalama uma ai Samoa, o le a lou finagalo? o lea ua 2 Komisi suesue, e tatau ea ona toe fai se isi suesuega, e toe tau mai ia i tatou, ia mea ua uma ona tatou iloa. O le faafesili atu lea.

Susuga Hon Laauli Polataivao Leuatea: Lau Afioga i le Fofoga Fatalai, ma le agaga faaaloalo, e augata le Malo...

SUI FOFOGA FETALAI: Malie le sui usufono... Gagaifomauga Nu 3.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Le sui usufono lea, sa Fofoga Fatalai foi le sui usufono lea.

SUI FOFOGA FETALAI: Se i alaala mai i lalo....

Susuga Hon Laauli Polataivao Leuatea: Sailiili po o le a le sao...

SUI FOFOGA FETALAI: E lelei ona ou fautuaina sui mamalu uma, aemaise le sui o Gagaifomauga Nu 3. Sa e nofo i le Nofoa lenei, e te silafia lelei taga ma Tulafono Tumau o le Maota. E faatoa avatu lava se faatagaga e saunoa ai se sui mamalu, pe a faataga atu e le Nofoa. Malie le sui usufono e lelei ona faautagia tatou Tulafono Tumau o le Maota. Ou te tapa lau Afioga i le Minisita. Ae lelei foi ona ou fautua atu i le Minisita, o le tiute lava lea o le Nofoa. O lo o taoto foi le lipoti o le faamai lea, ua oo i ai le saunoaga i le tulaga o Komiti faa-Palemene, e i ai le taimi ona toe saunoa foi lea pe a oo mai le latou lipoti i le tulaga aloaia. Ae talu ai ona o lo o tau fesoottai pea tulaga e pei ona e aumaia i lau saunoaga, o le ala lea o lou faatagaina. Ae malie le sui usufono, e lelei onalau Afioga i le Minisita, saunoa i mataupu na laga e sui mamalu. Ma le faaaloalo.

Tofa Hon FAIMALOTOA KIKA TEMAIMA STOWERS: Faafetai i lau Afioga i le Fofoga Fatalai, o sou vaivaga na i ai. E le i i ai ma se sui mamalu na lauga i le misela, a o lou vaivaiga lea e i ai, o le folasia o fuafuaga faataatitia a le Malo, e ala atu i lenei Matagaluega mo le agai i luma. E pei foi la ona saunoa le Afioga i le Palemia, o lou foi lena vaivaiga i lou tofi Minisita, i le toe faia. Ou te le toe fia tali i ai, o lea sa maea uma ona folasia

e le Afioga... ae i lou vaai totoa i ai, o le a toe maumau foi nei tupe e toe fai ai nei... se isi foi toe suesuega, o lea ua tatou iloa le mea na tupu. Ae o le naunautaiga lea ua taumafai i ai, tatou faia le fofo e foia ai le toe tulai mai o ni mataupu ogaoga faapea. E pei o le tulaga lena, ona o lea ua tutulai mai ina ua ou toe folasia le misela, ona e fesootai ma fuafuaga faataatitia ma le matou Matagaluega ma le Malo, ia o le ala lea lau Afioga i le Fofoga Fatalai.

SUI FOFOGA FETALAI: Tuu atu le avanoa i le Taitai o le Maota.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fatalai, o lea ua faamalieina lau fesili. Faafetai.

SUI FOFOGA FETALAI: Fautuaina le Afioga i le Minisita, ia faagasolo loa ae faamalulu atu i lau Afioga, faasee loa le saunoaga, ma taumafai e faamaea aua le faafogfa a le atunu ma le Maota.

Tofa Hon FAIMALOTOA KIKA TEMAIMA STOWERS: O le galuega la lea e pei ona ou talosagaina ma tau faamalamalama ina ia tosina mai finagalo o Samoa i le taua. E tele isi tui puipui o lea ua manao e uunai inaia soifua maloloina fanau a Samoa mo le tatou agai i luma. I le vaega lea o le corona virus, e le tau toe faamatalaina le vavao o le lalolagi atoa, e amata mai lava i Malo tetele, tele tamaoaiga se i pai i Malo laiti. E 193 atunu, e pei ona faamauna e le United Nations, Malo aufaatasi. E 12 atunu e aofia ai, o lo o faapena ona saogalemu, lea e aofia ai ma si o tatou atunu. E faafetaia ai la le tele o galuega puipui, ua faapena ona tatou faia faatasi, aemaise lava malaga a vaalele ma vaa alo ma vaa-alalo mai atunu mamao, e faafetai ai lo outou onosai ma le lava papale, a o alo atu le Malo i le faatinoina o ona tiute aua le saogalemu o le soifua o le atunu atoa, le National Health Security. E faafetai i le aufaigaluega a le Atua, aua na tomua lava i tatou Poloaiga faalauaitele i le vaiaso o anapogi, e talosia ai lo tatou atunu atoa. O la tatou te mautinoa lava le faamaoni o le alofa o le Atua ia Samoa. Faafetai i le Malo i ana Faiga Faavae ma ana tuutuuga, ua masuiga malie ai ma malosi ai lo tatou tali atu e puipua lo tatou atunu mai lenei faamai.

Lau Afioga i le Palemia ma le Kapaneta, malo le tofa manatunatu, faafetai le faatoatoa, aua ituaso faigata faapenei. Lau Afioga i le Taitaifono a le Komiti ma le Komiti o Faalavelave Tutupu Faafuasei. Faafetai, faafetai, faafetai, malo le fai o le faiva.

Lau Afioga i le Ofisa Sili o Pulega, le Pulega ma si o Matagaluega o le Soifua Maloloina. Ua faamalo le galulue, faafetai le tautua. E leai se mea o lilo i le silafaga a le Atua i la outou galuega i le ao ma le po. O lena e toe

avatu ai pea ma momoli atu le faafetai ia Samoa, i la outou faafofoga mai i la outou tatalo la outou tapuaiga, aemaise o lo outou lagolago.

Faafetai mo le Tala o le tupe. E le gata o lo o aumai pea le faamuamua i le soifua maloloina, ae e atagia ai le faaso, o lo o i ai lava le taofiofi ma le fatoetoe auu ituaso le ma-iloa faapenei. Aua o lenei faamai, o lena ua saunoa i ai le sui, e leai se fualau ua maua po o se tui puipui foi. Ae o le agaga lena o lea na ou taumafai atu, ina ia tatou mataala i isi mau puipuiga i le tele o faamai o lo o faapena ona faalogo atu i lea atunu ma lea atunu ma lea atunu, o mea ia tatou te moe manatunatu i ai.

Lau Afioga i le Fofoga Fetalai, e tele lava nisi o fuafuaga ua vaai mamao i ai mo le agai i luma, ae e tele lava faafitauli o lo o fetaiai pea ma le Matagaluega. Sei vagana... o le isi faafitauli tele e le taitai lava le aufaigaluega a le Matagaluega i vaega eseese. Pe a faatusatusa i le misela, se meamanu o le taunu mai o fesoasoani o le mau teams eseese mai fafo, e le iloa pe faapefea ona gafatia e fomai. O le taimi nei na o le 68 fomai o lo o galulue i totonu o falemai o itumalo, pe a faatusatusa i le ova i le 200,000 le faitau aofai, e matua le gafatia lava. O le ala lena o le faamamafa o le puipuiga i le taimi lenei, ina ia tatou tapenapena i ai, a o faapena ona tatou tatalo atu ia aua ne i oo mai le faamai lea. E tele mea o lo o manaomia i totonu o falemai, aemaise ia Motootua ma Tuasivi, le faatotogaina o falemai i masini ma mea faigaluega e manaomia e fomai, ma le aufaigaluega e faatino ai togafitiga mo le mamalu o le atunu. O le isi tulaga lea, ua tosina le vaai, a ou vaavaai au ia i le tai fia miliona o lo o tuu e le Ofisa o tupe i le paketi a le Matagaluega o le Soifua Maloloina i tausaga uma, tausaga taitasi. Mo le polokalame lea o togafitiga mo gasegase o lo o auina atu i atunu mamao, o Niu Sila ma... matua tetele nei tupe. Ae a maea ona aumai uma mea e manaomia, e taugofie mamao le aumai o specialist e fai i inei taotoga, aemaise, at the same time e up-skill ai le tomai ma le poto faapitoa o tatou fomai, ma latou uma e aafia i totonu o taotoga, i le tulaga lea. Pei o nisi o fuafuaga mamao, ua lava ia fuafuaga i lenei taimi. Ae o le tele ia o le mea o lo o tilotilo i ai le Malo, ina ia mautu nei fuafuaga mo le soifua manuia o Samoa i le lumana.

Ona oo mai lea o se faamatalaga i le Tala Autu o le tupe 2020/2021, faapea foi le Tala Faatatau Faaopoopo Nu 3 o le tupe 2019/2020, faafetai tele i lau Afioga i le Minisita, faapena foi lau Afioga i le Ofisa Sili ma le Matagaluega o tupe, malo lava galulue. E lagolagoina e lenei itumalo la outou galuega fita ma le maeaea, e pei ona saunia ai le Tala o le tupe.

Lau Afioga i le Fofoga Fetalai, ae le i faaiuina se faamatalaga, ua ou manatu o le avanoa lelei lenei, ou te afea ai le faafogafoga tapuai mai o si ou itumalo pele, o Gagaifomauga Nu 1. Ou te muai ofo alofa atu ma faafeiloai aloaia atu i le aufaigaluega totofi a le Atua o lo o galulue punouai ma nonomanu i totonu o si o tatou itumalo, aua se manuia o Samoa, aemaise o si o tatou itumalo mo le agai i luma. Malo le tatalo, malo le tapuai i lau susuga i le

toeaina Tanielu ma le faletua, a lua Afioga i le au Ositaulaga, Patele ma Patele. Lau susuga i le fesoasoani ma le faletua, lau susuga i le faafeagaiga Metotisi ma le faletua, faapea foi lau susuga Filipo ma le faletua le ekalesia EFKS i Manase. Lau susuga i le Epikopo, le ekalesia Mamona, a outou afioga i Tamaitai-sa o augafaapae o le Talalelei. Ua faamalo le tatalo, faamalo le tapuai, faafetai mo foi faamanuiaga i taimi uma e feiloai ai, e molimoli mai, ia tatou tuu lea i le Atua e fesoasoani mai.

Le mamalu o si o tatou itumalo o Gagaifomauga Nu 1, i outou tulaga faalupea, le paia lava lea aua tama sao, le aiga Saaumalau le Atipouniu ma le faasau. Lau fetalaiga i le tulafale, o le alii o le itu, lau tofa Lavea, o le pule na mua i malae, e te tausi vaatele aua le puipuiga o le malae i Finau e feagai ai ma le usoga a Pule ma Tumua nei. Le mamalu ia te oe Safotu ma le paia o aiga, faatalofa foi ma faafeiloai aloaia atu i si o matou nuu i Manase. Le afio o Taito ma ona alo, aemaise lau fetalaiga Tauasa. Lou itumalo, ua faafetai tele mo a outou talosaga, ua faamalo tele i la outou tapuaiga, faafetai tele atu foi mo la outou tuualalo ma fautuaga mai lea taimi i lea taimi. E lagona lava le mafanafana male lototele i taimi uma. Ona ua ou talitonu i la outou tatalo ma la outou tapuaiga aemaise o la outou tuualalo ma fautuaga. Ia saga faamanuia le Atua i feau ma galuega o feagai ai, aua le manuia o aiga ma le nuu, aemaise o si o tatou itumalo ma le atunu. E faafetai tele atu foi i le tatou itumalo mo le feiloaiga ma le Komiti a le Palemene, molimoli mai le agaga fiafia o le Komiti, e le i tau faamalamalamaina le tatou itumalo. Aemaise ai foi o la outou faasoa anoa sa outou fetufaaai ai, ia ua malo faafetai.

Ona faatai lea o se faamatalaga, agalelei le Atua, faatautaia o le Fonotaga a Samoa e le faigofie, aemaise foi o le taimi e siisii ai le tai i finagalo o sui usufono. Malo le faapalepale malo le onosai. Faamanuia le Atua i le Taitai o le Malo, lau Afioga i le Palemia faapea le Sui Palemia, ma le paia maualuga o le Maota. Faamanuia i le tapuaiga a Samoa, ae ola le sui usufono mo Gagaifomauga Nu 1. Faafetai.

SUI FOFOGA FETALAI: Malo faafetai. Ua o se matagi e agiagi malie i le faafogofa ma lagona o le atunu aemaise le Maota nei, ae i ai foi le talitonuga o lele ua logo faa-Tutuila. Ua logologo pualilo nai vaegā, le saunoaga matagofie ma le malalamala a lau Afioga i le Minisita. Malo le tapena, malo sauni, a o se laolao lelei foi e fai ai le leo faatauvaa, a o tatou i ai i le talanoaina o tulaga maaleale o si o tatou atunu e ala i le faamai. E momoli aloaia atu ai le faafetai tele i lau Afioga i le Minisita, ma le Minisita lagolago o le Soifua Maloloina, faapea foi lau Afioga i le Ofisa Sili o Pulega, ma le Matagaluega o le Soifua Maloloina, i lo outou fita i tuga, i le ao ma le po, aua le faamoemoe o le Malo ia puipuia ona tagatanuu i le pepesi o le faamai Koviti-19. O le matou tatalo, ia i ai le alofa ma le agalelei o le Atua i lau Afioga i le Minsita ma le Sui Minisita ma le Matagaluega.

Faalototeleina outou, o lo o outou taulamua, aua le puipuiga o si o tatou atunuu.

Foi le viiga i le Atua, o lo o saogalemu Samoa ma ona tagata. Malo galulue, viia le Atua i mea uma. Ia e faapea foi Matagaluega eseese a le Malo, o lo o galulue faatasi, ina ia maua lava le faamoemoe maualuga lea. Ia saogalemu Samoa ma ona tagata. Manuia le Fonotaga lau Afioga i le Minisita, ia faapea foi le Sui Minisita.

Ia, o lea ua oo mai le faasologa, ou te tapa ma le faaaloalo lau Afioga i le Minisita, o Faatoaga ma Faigafaiva, e tali fuaitau i nisi o mataupu, sa laga e sui usufono mamalu.

Afioga Hon LOPAOO NATANIELU MUA (Minisita o Matagaluega o Faatoaga ma Faigafaiva, ma Faalapotopotoga o Suesuega Faasaienisi):
Ia lau Afioga i le Fofoga Fatalai o le Maota, faapea foi sui usufono mamalu o le Maota Fono. Ae ou te le i taina le tavai e fai ma too, pe sulua foi le too e fai ma tula e pei o le seuga e ifoifo i le alo o le Tuiaana. E muamua ona ou taia le tutafaitoa na see lilia ai Savea Siuleo, e pei o le fetalaiga i le ava i Utumalama. Ae o lea ua tumalo le mauga, mauga o tula na tafai e le falefa o sula, e pei o le tala i le tuavao o le Vaimauga. E tulilia foi, ae maniti tino i pisaga, ina ua le tauilo asaga, o aao o alii. A o tapu foi o le faatamasoaliiga ia ae, na i le papa i maluafiti.

Afai ou te sosoli, faufau, e ao lava ina ou sosoli ma le faaeteete, i nei mea ane ua leua lau o le fo, ona le soo lea o taiao, aua sou igagato. Tulou, tulouna lava. Ae ou te le i laa loa, e muamua lava ona ou taia le vaiafei ma sausau i moana. Aua le paia faafofoga mai a Samoa, le afio o Tama ma Aiga, Aiga ma Tama, le Usoga a Tumua ma Pule, Aiga i le Tai ma le Vaa o Fonoti. O paia na o le ta atunuu, ua uma ona aisa, e sau mai i Saua seia gata i Agalega.

Lau Afioga i le Fofoga Fatalai ma le paia o le Maota, e faafetai tele atu mo se avanoa o le Matagaluega o Faatoaga ma Faigafaiva, ma le Faalapotopotoga o Saienisi a Samoa, e tali atu ai i mataupu na folasia e sui usufono mamalu o le Maota. E patino i a matou auaunaga. Faataga mai au lau Afioga, se i molimoli atu, nai o matou alofaaga mai i Pule Sili o Matagaluega e lua, Faatonu, Taitaifono ma Fono a Faatonu a le Matagaluega a le SROS, e faapea foi le aufaigaluega, i lau Afioga ma le mamalu o le Maota nei. Tainane alofaaga ma moomooga alofa mai i lo matou itumalo, o Vaisigano Nu.1 i lau Afioga ma le mamalu o le Maota.

Ae seu pea le manu ae fefe i le galu, se i ou pai ane lava se i faatalofa atu i lau Afioga i le Taitai o le Malo, lau Afioga i le Palemia o le Malo o Samoa, faapea foi le Afioga i le Sui Palemia ma le mamalu i le Kabeneta ma Minisita Lagolago. Afifio foi lena Itu o le Maota, i Afioga i Taitaifono, Sui Taitaifono, sui usufono mamalu o le Maota o Samoa. O ipu lava na filifilia e le Atua, e tauasuina lona finagalo, o lana tofa, o lana uta, ma le finagalo fetalai. Malo le soifua, malo le lagi e mama.

Ae e leaga na ou amata i le Itu lea, ou te fia tepa ane i le isi itu o le tatou pulega. I lau Afioga i le Faamasino Sili, lau Afioga Satiu Simativa Perese. Peresetene o Faamasinoga o Fanua ma Suafa, lau Afioga Fepuleai Attila. Le vasega o Faamasino ma le mamalu o le Ofisa o Faamasinoga. Avea foi lenei itula ma lenei ituaso, e molimoli atu ai o matou alofaaga, i lau Afioga i le Faamasino Sili, lau Afioga Satiu Simativa Perese, i le tofia o lau Afioga, e umia o le tofi o Faamasino Sili o le Faamasinoga o le Malo o Samoa.

Faatalofa atu foi i Ofisa Sili o Pulega o Matagaluega ma Faalapotopotoga Tumaoti a lo tatou Malo. Malo foi le fai o le faiva i a outou Afioga. E fia faaaaoga foi lenei taimi e faatalofa atu ai i le Malo i Sasae i le Afio o Sua ma le Vaifanua, Fofo ma Aitulagi, Saole ma le Launiu na Saelua, Faatuiolemotu ma upu ia te oe le Manuatele.

E fia faatalofa atu i le paia o le aufaigaluega galulue a le Atua, o lo o tala faauto, i itu e fa o Samoa ma o outou faletua, o nofoaalo. Faafetai mo le tatalo, faafetai mo le tapuaiga. E avea foi lenei taimi ma lenei avanoa matagofie ou te fia faatalofa faapitoa atu ai i le aufaigaluega a le Atua o lo o i totonu o lou itumalo, Vaisigano Nu.1. mai Asau seja oo atu i Vaisala. Malo lava le soifua ma le lagi e mama i a outou Susuga ma a outou faletua, faapea foi le paia o le nofoaalo i la outou tatalo leleo a faia i aso uma. Ua faapea ona manuia ai faiva o la outou auauna. E faapito augafa se faamatalaga e faaleoina atu le faafetai i lau Susuga i le aao tusitusi o le Sinoti o le Ekalesia Metotisi i Salafai i Sisifo, lau Susuga Reupena ma le faletua ia Malaea, faafetai mo le fautua.

E faatalofa atu ia Vaisala, le afio o lau afioga i le Tapaaau, i lau afioga Toomata, susu lau susuga i le gafa, lau susuga Vaepule. Afio lau afioga i le aloalii lau afioga Vaai faapea foi le mamalu maualuga ia te oe Taulauniu ma Saoloapu. Faatalofa atu foi i lou afioaga o Auala, afio o Tapu ma Atimaletai, afio foi Alaimalo aemaise le alalatai o lo outou Toalima ma upu ia te oe Safune. Faatalofa atu i si ou nuu o Asau, le afio o le matua ia Masoe, ma le aiga Sa Masoā, susu mai lau susuga Tufuga ma Sa Tufugā, falefa o le Usoalii faapea lo outou Maopu. Maliu mai Salafai faiga i le faaituala lua o le falefia ma le sio o le fanua. Afio mai oe lea na pule e ono i ai Pule o le tatou usoga i Salafai.

O alofaaga mai i lo outou tofi, malo le soifua, malo foi i le faataunuina o tiute ma galuega, faapea foi i le puleaina ma le vaavaaia o nuu ma afioaga. Sosoo atu se faafetai, faatalofa atu i le mamalu o le aufai faatoaga, o le aufai faiva, o le aufai lafumanu. Faapea foi paaga a le Matagaluega o Faatoaga ma Faigafaiva ma le Ofisa Suesue o le SROS i totonu o le tatou atunuu. Nai a tatou paaga masani i totonu o le Private Sector, po o Kamupani Tumaoti, malo i a outou galuega fai.

O le aufai faatoaga ma le au tautai, faafetai ua ai ma inu Samoa i lo outou toto masaa, ma lo outou afu liligi. O lou tigaina ma lou lavelavea, o lou ala usu i le taeao sesegi e gagau le vao. O lou faaopeaopea i le vasa ma lou taase

i le vao, aua le tautuaina o nuu, ma aiga ma Ekalesia aemaise ia lo tatou atunuu. O la outou galuega e le o se galuega fou, o le galuega ua leva ona fai. O polokalame ma fuafuaga a le Malo o lo o faia i le taimi nei, o le avatu lea o le faamalosiaga ia te outou. Ina ia tupu ma ola, ma saga ola atili ai lava atinae, o lo o faatino ma faia i totonu o lo tatou atunuu e lo outou paia.

O le mea moni, e leai se Samoa na tu i se laina, i le taimi o le Koviti-19. E leai se isi na tu i se laina, e aisi i le Malo, ina ia tuu se meaai i le manava. E pei ona tatou vaai, i le tele o atunuu tetele e pei o Amerika, ma isi atunuu e oo lava i papalagi, ua tutu i le kiu i luga o auala, e fia aai. Ae o le faamalo lena a le tou Minisita ma le Matagaluega, tainane foi le Malo, i la outou galuega, i la outou tautua ia Samoa. E leai se Samoa na fia ai. Malo le fai o le faiva, malo le fitaituga, sa e matagia ma faamaia, peitai, fai pea lau galuega. Taatia maia laia i le Malo, i le fuafuaga ua uma ona faataatitia, e pei ona logoina ai ia lo tatou atunuu. Fesoasoania tu i a outou taumafaiga o lo o faia, ina ia mausali, tupu ma ola pea aua le tautuaina o le aiga, afioaga, le Ekalesia, faapea si o tatou atunuu.

Faafetai tele lava i le au vaega lea e lauina ia le tatou oloa i fafo. Na matauina i le taimi o le Koviti, o nisi o outou, a faapea o le masina fou e alu ai le vaa, e totogi atu le afa o le tagatalo ae se i sau le vaa, ona ao mai lea o le talo, ia ma totogi faauma atu, e ala i la outou fesoasoani i nai a tatou faifaatoaga. Ina ia mafai, ona faia pea, ma faataunuina manaoga masani i totonu o aiga. Malo lava, faafetai. E tau le faailoa atu o outou suafa, ae e silafia e le Atua mea uma.

E i ai le faafetai faapitoa lava e fia fai atu, faafetai tele lava i le Ofisa o le Malo Aufaatusi, sa matou tagi atu i se masini, e suesue ai le fiva Aferika i meatuaolo. E faapea foi e mafai ai ona sue ai le Koviti-19. Sa tali mai le Faalapotopotoga faafetai tele lava. E fia momoli foi le agaga faafetai i le Faauluuluga o le UN i totonu o Samoa le Susuga ia Simona Maranessque, o lana fesoasoani ma lana taumafai ma aumaia lenei masini. E le gata la i le masini ua aumai, faapea foi ma le 2,000 tui e mafai ona suesue ai le Koviti, mafai foi ona aumai ma le isi 2,000 ua taunuu mai, mo le suesueina o le fiva Aferika mo meatuaolo. Ia a manaomia e lau Afioga i le Tamaitai Minisita ma le Matagaluega o la ua i ai, ae faalogologo mai pea po o le a so outou finagalo.

E faaataata lafoga foi ae i le Afioga i le uso Minisita ia Afamasaga Rico Tupai, faafetai tele lava. Leaga o au connection ia ma le UN lea na mafai ai ona faatino le mea lea. Faafetai foi i lau Afioga i le Minisita o Tupe mo le lagolagoina o le talosaga ma le mamalu o le Malo i lau Afioga i le Taitai, faapea le Kapaneta atoa. Aua o lenei ua taunuu mai lenei masini aoga tele mo si o tatou atunuu.

Ia, ona ou faasolo ai loa lea, i mataupu sa laga mai e lo tatou Maota nei. E toa 11 latou na lauga i le Matagaluega o Faatoaga ma Faigafaiva, ae o le tele lava o lauga, o isi o le faafetai. O le isi tasi na lauga mai... ia e le mafai ona

ou iloa le mea lena pe ana iloa e ia le mea na manao ai. Ae atonu lava e leiloa pe oo atu i le taimi e fai atu ai le auiliiliga atu ina o mataupu, ia ua mafai ona tu mai e faailoa tonu le mataupu na fia faamalamalama ai.

Ae o le tulaga i le tatou falesuesue i Nafanua, o le manaia ia o le miti na fai ai, na faatu ai le polokalame lenei a le Malo. Ua tatou i ai foi i lenei vaitaimi o le olaga, ua amata ona mumusu atunu e avatu ia tatou oloa mata, i totonu o latou eleele. Aua foi ua sili atu le taua atu ia te i latou ia latou foi faatoaga. E pei ona saunoa le Afioaga i le Taitai o le Malo, o le manatu autu lena ala ai ona faatuina le tatou falesuesue... ae o le mea moni, e fanau mai ai i ina, le tele o nisi galuega matagofie ma le lelei tele o lo o faapea ona faataunuina ma faatinoina e le tatou falesuesue.

O le faamalosiau la lea a le Malo, lea e ova i le 10 tausaga talu ai na ala ai ona faatu le falesuesue, o lenei ua oo mai i le 2020, ma ua iloa ai, o le tele naua o mea e mafai ona faia e le gata o lo o i ai ia tatou fanau, o lo o auina atu i fafo e aoaoina ma toe foi mai a o o le mafai ona faatino o suesuega faapea, i totonu o lo tatou atunu, i laau ma meatoto o lo o maua i lo tatou lauelele ma lo tatou gataifale.

Ua le gata i le faatinoina o meaai ma meataumafa e mafai ona aumai i fua o faatoaga, ma le tele o isi mea o suauu, ua mafai ona gaosia mai e le gata i popo, ae ua mafai ona faatino i le faaaogaina o laau e masani ona tatou faatuatanai ai, e pei o le fetau ma le tele o isi laau. Ua atagia ai i ina le tele o le tamaoaiga, o lo o maua i totonu o lo tatou atunu. Ae o lenei ua i ai ia te i tatou, le auupega lenei ua mafai ona tatou aapa ma faaaoga, aua le faamalosia pea o a tatou taumafaiga i totonu o lo tatou atunu e ala i a tatou faatoaga, ma lo tatou gataifale.

E pei ona silafia, ua mafai e le SROS ona faia le uisiki e fau mai i le talo. Ua mafai foi ona faia le falaoamata e maua mai i le ulu ma le manioka. Ua mafai ona maua mai le margarine i le moli o lo o maua i totonu o lo tatou atunu. Ua maua foi le rum, e gaosia mai i le tolo uli. Suauu manogi e fai mai i le moegalo. O le mosooi, eucalyptus, tigamoni ma le moli. Ua mafai foi ona fai le isi fagumalosi o le Bourbon, fai mai i le vi. O laau e tele e vao ai lo tatou atunu, ia, ae na faapea lea, ia ana fai lava na o na mea malosi ma onana ai, te i foi ua uma ona pisa i le olioli ae fai mai e pisa mai i le uisiki ma le...

Ae o le manatu o le Malo ma le manatu o le Matagaluega, e lelei tele tatou uisiki o lo o mafai ona tauva ma uisiki i atunu mamao. Ua ave foi ia le tatou uisiki i fafo i faaaliga oloa sa faia i Shanghai, manaia tele le feedback. O le tala mai o le manaomia, ae o le faalavelave e le lava. O le ala lena ua ala ai ona lagolagosua e le Malo, le talosaga a le SROS, e faatuina sona fale gaosi oloa, e mafai ai ona fai le uisiki.

O le mafuaaga lenei, o le vaega o le Private Sector ua leva ona faatalanoaina ai ma nisi, ia pe faamatuina atu.... e taumafai atu e tuu atu ia tatou suesuega ia ua uma ona maea ona fai i laau i mea toto i lo tatou atunu ina ia faatino

loa. Ae peitai, e leai se isi na sii i luga le lima ma faapea mai, aumai ia te au. Sei vagana ai nai falegaosi mea laiti e pei o le Mahealani, o si toeaina o Uaea Apelu, nai vaega na ua faagaioi ai a latou taumafaiga laiti, e fai ai le suau popo, fai ai ia nai suau manogi, ma faatau atu. E faapena foi ia le WIBDI, o le women in business o lo o fai foi ia latou suau, ia faapea ma faatau atu i se maketi tele i Peretania.

Ae o tulaga faapea e manaomia ai ni masini tetele ma se huge capital investments, e le o faigaofie i le Private Sector ona feosofi mai e avatu. O le ala la lea ua mafai ona talia e le Kabeneta ma le Malo le talosaga, ma ua faatino loa. Aua o le mea moni lava, toeitiiti lava oso ifo foi se isi... po o Fiti po o ai? Fai ia le latou whiskey i le talo, ae paga lea, ua leva ona tatou faia. Ia o lea la ua tuuina e le Malo le \$2.5 miliona, o lea foi e faafogoa i ai i le tatou Tala Faatatau Faaopoopo Muamua o le tatou stimulus, o lea la ua sau ai le vaega tupe lea.

Ma le isi mea o lo outou silafia, o le talo, i duesuega na faia e le SROS, e mafai ona tuuvisa mo le 12 ma ona tupu masina ae lelei lava. O mea ia e tutupu nei i le alu i luga pau i lalo le tau o le talo, ua matou tilotilo atu i ai, o le tasi lea o auala e mafai ona stabilize ai le price. E mafai ona tatou aumai le tatou talo tuu i i, a vaai atu i le taimi po o le masina fou po o le isi... po o le faaiuga o le tausaga leaga ua tele le talo lea e toto. A vaai atu la ua tele le talo, ia ona aumai loa lea ave tuu i le aisa ... a ready loa masini a le SROS e fai ai, ia ona faaaoga laia i ai, ae e le mafai, aua o le talo lea ua uma ona toto nei i le masina lea e 2 na tea atu nei, po o se mea o le afa miliona. Faaopoopo i le tele o isi talo, o la ua leva ona toto e le mamalu o le aufai faatoaga.

Ae e pei o le popolega lena sa i ai, ae peitai o lea la ua maua lea auala, o le.... e le gata o le talo e fai ai le uisiki, ae o lea ua mafai foi ona fai ai le sanitizer, i le ethanol po o le efanolo la e maua mai i le talo. O le tasi lena oloa alumia i lenei vaitau, ia a faapea foi e leai, e faaaoga lava e tatou, ia ona le toe oka maia lea o ni tatou fululima po o ni sanitizer mai fafo, ia ae faaaoga mea o lo o mafai ona fausia i totonu o lo tatou atunuu, sefe ai ma tatou tupe e faaalu i atunuu mamao.

O lo o faia foi ia le pepa e gaosia i le... ua uma ona fai ia duesuega i le pepa e mafai ona fai i le pau o le fai. E pei uma lava ou te faalogo atu o le a fai ai le pusa foi lea e tuu i ai fuamo. O taseni fuamo lea e te alu faatau mai i le faleololo. Ua ou vaai atu i le.... ou faitatala laitiiti o taumafai i ai ia le.... la e fai mai e le SROS le mea lena ae faaaoga le pau o le fai.

Ia o le suauv avoka, suauv popo, pata e fai mai i le avoka, ia o le koko pata, talo faaaisa e pei ona ou tautala atu ai, ulu faaaisa, uu manogi, o le tino e fai mai i le coconut oil, cocoa butter, avocado ma le wax, ia faapea foi faguu manogi eseese. A oo i le taimi tou te le toe faatauina mai ai mea faamanogi ia e uu ai outou tino pe a faapea e sau i fafo mea nei e faia e le SROS. O le matua manogi ae fai i le mosooi po o le a le isi mea? Mosooi, tigamoni, o mea na o lea e mafai ona fai i totonu o Samoa i le tatou falesuesue. O le

lagaali pe na faalogo outou i le mea e tau i le lagaali e tele i Savaii. Ioe, leai la ou te leiloa pe faaaoga ai se avaavaaitu i se mea manogi ae e le afaina...

E le gata la i mea ia sa fai ai oloa, ae o lo o faia foi e le SROS, suesuega i se fofo o le Type1 ma le Type2 diabetes. E 200 laau ua uma ona aoina, ma e o lo o faaaauau pea. O lo o faia foi suesuega o le papala ma mai e mafua mai i siama ua le mafai ona faumatia e fualau, antimicrobial resistance, 200 laau ua maea ona aoina, 20 laau ua mafai ona faamaonia e mafai ona tineia ai faamai faapenei.

E le gata i lena, o suesuega i le kanesa o lo o faatinoina i lo tatou falesuesue, 50 meaola mai i le sami, ua maea ona aoina ma o lo o faia i ai ia suesuega i le taimi nei. Ia ae faamoemoe i le Atua, e fesoasoani i nai a tatou Saientisi. O Saientisi uma la e i le SROS, e leai se palagi o i ai. E na o Samoa lava. A ua i ai Masters, ua i ai foi PHDs, ia ua i ai foi ma Polofesa. Faafetai ia te outou, o lo o faapea ona faatinoina lea galuega. E tele o latou totogi e mafai ona maua mai isi mea, ae o le lotonuu o le tama ma le teine Samoa, ua mafua ai le nofo pea i totonu o Samoa ma fesoasoani i le taumafaiga a le Malo i le atinaeina o si o tatou atunuu.

O le a ou see atu i le Matagaluega o Faatoaga. E le o manofonofo le Matagaluega o Faatoaga ma Faigafaiva i ona tiute ma ana galuega o lo o faia. E fia amata sau faamatalaga i le manu ainiu. A outou silasila i outou tuamaota, e leai se niu, toeitiiti leai se vaega po o se niu o niu ia e maua i Samoa e le o atiatia i le manu ainiu. O le ala lea na ala ai ona taumafai le Matagaluega. Sa faia muamua le polokalame sa avatu i pulenuu e ao mai le manu ainiu. Manaia, sa avatu foi nai seleni i ai, lea foi na maua ai le tupe a le Afioga ia Tafua ma lona itumalo lea na fai mai ia te au, e faapena foi Anoamaa. O le tausaga lea na tea atu nei pe \$2,500 ea le latou tupe na maua. Ma o lo o faaaauau pea la le polokalame lena, faaaauau pea, ae peitai ane, e le o lava. O le mea la lea pei ona outou silasila i le Tala o le Tupe, e \$.5 miliona o lo o i ai i totonu mo le taumafaiga o le manu ainiu. Ou te faafetai i le afioaga lea o Satapuala, na omai tatalo mai pe mafai lava ona avatu ni ili afi se lua e o e fai le latou galuega, fai le latou sanitation fai le latou... ta i lalo le niu ma tipitipi oganiu tulou, ae aveese le manu ainiu ma fai le mea e toulu ai le manu ainiu pei ona masani ai ma fesoasoani atu i ai le Matagaluega o Faatoaga.

Afioga Alaiasa Muagututia Moefaaouou Malagaitutogiai Sepulona Moananu: Lau Afioga i le Fofoga Fetalai...

SUI FOFOGA FETALAI: Malie lau Afioga i le Minisita se i tuu atu le avanoa lea i le sui usufono mo Anoamaa Sasae.

Afioga Alaiasa Muagututia Moefaaouou Malagaitutogiai Sepulona Moananu: Ua usiusi a faa-vaa o savili le saunoaga a le Afioga i le Minisita.

O lea foi la ua oo i mea nei o manu ainiu, e sao le Afioga lelei le saunoaga a le Minisita i si o matou foi itumalo ma le galuega tele o lo o taufai e ao mai le manu ainiu. E i ai foi la ona itu lelei, ae i ai foi ona itu faale-lelei, aua ua oo lava i toganiu o isi tagata ua fai ai faiga a le au sue manu ainiu leaga o lea e maua ai le seleni. Ta te alu atu i lota toganiu i tua, ua alu i le atoa le iliga lalo o niu e i latou o lo o sailia le... Ae pe faamata lau Afioga i le Minisita e le o i ai se tatou vailaau foi lea e tineia motu ai le manu ainiu lea aua o le fili numera tasi lea o tatou niu. O le matou lea tuutuualalo atu aua pei na o le o lava e ao mai mea ua lapopoa, ae tatau ona tineia le manu ainiu a o amata lona tupuaga foi lea.

Ia ma le isi mea lea ua maea le saunoaga i tatou saienitisi foi ia i gauta ma latou suesuega, pe le o sailiilia ai ma se vaifofo o le tatou faamai lea e i ai nei e saienitisi? Pe le o le au saienitisi foi lea o lea na saunoa i ai le sui usufono mo Palauli Sisifo lea e ala ai ona pei e mimita foi lele i lipoti a le au saienitisi ia e faitau ai. Ia, ma le agaga faaaloalo. Manuia le tatou Fono.

Afioga Tafua Maluelue Tafua: Lau Afioga i le Fofoga Fetalai...

SUI FOFOGA FETALAI: Ia, se i tulai mai le sui usufono mo Aleipata Itupa i Lalo.

Afioga Tafua Maluelue Tafua: Faafetai lava. Ia e faaopoopo atu foi le agaga faafetai i le Afioga i le Minisita mo Faatoaga si au uo mamae. O le mea e fia faasao lau Afioga, faamolemole e leai e le \$1,500 pe \$2,500 le matou tuge, e \$3,000 le matou tuge. O le nuu foi lenei na sili i le tele o manu ainiu. Ae ou faaopoopo atu ai la i lau Afioga ma le faaaloalo, se ua tele mea o paipa lae i ai, o lo o faapea lava nisi ai o fai ni au... po o a au mea la e fai i au paipa papae la e tutu solo i lou toganiu, na o le tumu ai o le mea ae leai ma se mea, ou te le iloa e leai se isi e faamalamalama po o le a le uiga o lena mea. Na pau lava le tala ua tuu atu fai mai o le mea e pue ai le manu ainiu, ae ou te le i vaai faatasi ua alu atu se isi e ao mai. Ou te talosaga atu ai i lau Afioga faamolemole se i vaai ifo le vaega lea. Ia pe maua ni matou tiapula pe a maua faamolemole.

SUI FOFOGA FETALAI: Ia, tuu atu le avanoa i le sui usufono mo Palauli Sisifo.

Afioga Afoa Amituanai Taleulu Mauli: Lau Afioga i le Fofoga Fetalai, leaga o lea ua taua au e le sui usufono lea, e leai atu, e le faaaogaina e le sui usufono lenei le tatou saienitisi la e i gauta o mea o laau la e suesue ai. A o le saienitisi lea ta te feiloai, the best in the world le tamaloa lea. O le faamalamalamaga atu lena lau Afioga.

Afioga Alaiasa Muagututia Moefaaouou Malagaitutogiai Sepulona
Moananu: Lau Afioga lona uiga la...

SUI FOFOGA FETALAI: Faafetai. E le faia se lua faafinauga i le mea lea, na pau lava le mea o lea ua faafofoga le Maota.

Afioga Alaiasa Muagututia Moefaaouou Malagaitutogiai Sepulona
Moananu: E fia malamalama la, lona uiga o saienitisi mai fafo lea e saunoa i ai ae le o tatou saienitisi i totonu nei.

SUI FOFOGA FETALAI: Ia. Tuu atu le avanoa i le sui usufono mo Faleata Sisifo.

Afioga Alaiasa Muagututia Moefaaouou Malagaitutogiai Sepulona
Moananu: Ou te fesili atu i le sui usufono lea, po o le a sau vaai i le fualau lea o le hydroxychloroquine. E a, e aoga e tape ai le faamai?

Afioga Afoa Amituanai Faleulu Mauli: Lau Afioga i le Fofoga Fetalai...

SUI FOFOGA FETALAI: A e fia tali ona tali lea, ae a leai...

Afioga Afoa Amituanai Faleula Mauli: O lena ua e silasila, e le mafai e se... o le vaccine lea e talanoa i ai le vaega lea, e le maua, ma e le toe maua lava. So, e pau lava le mea o le faatali i ai... aua e le taitai ona aumaia sana... a o le fualau lea e saunoa i ai le Afioga, tasi lena fualau o lea ua amata ai le fofo...

SUI FOFOGA FETALAI: O lea ua maua, alaala i lalo le sui usufono. Ia se i tuu atu le avanoa i le Taitai o le Malo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, o lea ou te vaai atu ua ta le 1, ae pe malie le saienitisi le la mai o i Palauli Sisifo, se tuu ai pea au saienitisi aua le toe aumaia. E leai lava se isi e malamalama i na saienitisi, ae aua le toe aumaia, leaga e oo i saienitisi na o i le masina. Masalo o se isi o saienitisi na lea e aumai, ae soia ia tatou te toe faalogo i ia saienitisi. A maua ana fualau, ave i o i lona itumalo e tatui uma ai.

SUI FOFOGA FETALAI: Ia, o nai toega laiti e faamaea ai le Fono i lenei aso. A mea foi le faaosooso o le sui usufono lea mo Anoamaa Sasae.

Ae tuu atu le avanoa lea, a maea le sui usufono lea mo Faleata Sisifo, ona faatali lea se i tali le Minisita taeao.

Tofa Lealailepule Rimoni Aiafi: Faafetai lava i lau Afioga, ua faaiu e Faleata le tatou Fonotaga matagofie o lenei aso. O le tulaga lea e i ai nai faipule o le tatou Palestine ma nai sui usufono ia, e fiu lava le Minisita o Faatoaga e sue se fofo, e tasi lava le fofo o le fuesina e matua mili ai le tino moe ai lea i le po ala mai i le taeao toe fou lou mafaufau. A o le mea lea o le... sa ou taua le mea lea o le beetle nut, ona e 3 ituaiga nuts lau Afioga, ituaiga manu ainiu ia. A o le manu lava lea ua ou nofo nei i Vaitele lea ua savali le 20 tausaga o ou i ai, faatoa ou toe vaai lea ua taatele le manu lea i lou fale, e le masani ai. Na pau la le mea lea ou te fia fesili ai i le Afioga i le Minisita, leaga e i ai le fofo lea e tau fai e le Matagaluega, e pei e o atu e i ai le virus lea ua aumai e latou mai Niu Sila e tui ai manu ia ona toe release uma lea i totolu o nuu nei. E i ai la manu lea, i lou talitonuga lea ua toe faateleina i totolu o lou itumalo, ae pe work lea mea, pe mafai ona tineia ai le faamai i le mea lea. Aua i lou talitonuga, ua 10 tausaga talu ai na amata mai ai, o lea ua faatupulaia le tele o le manu lea, ae i ai la le fofo fou lea ua fai nei e le Matagaluega ma toe tuu mai ai manu ia i tua pei e aumai foi lele e build ai le immune foi lele po o le a le faiga, ou te le malamalama i ai, aua pei e i ai le virus lea na aumai e latou mai Niu Sila tui ai le manu lea. I lou talitonuga o lea e pei ua faatetele ai le manu i totolu o lou itumalo. Po o le a se tali a le afioga i le Minisita e alu e suesue lelei, ona tatou feiloai ai lea taeao pe a aulia. Faafetai lava. Manua le tatou Fono.

SUI FOFOGA FETALAI: Ou te faamalulu atu i sui usufono mamalu uma sa saunoa, a o saunoa le Afioga i le Minisita mo Faatoaga ma Faigafaiva. O le a tapena le Minisita e tali i a outou fesili pe a tatou aulia le aso a taeao.

Ua tatou taunu mai i le faaiuga o a tatou galuega i lenei aso e pei ona i ai le faatulagaina i lea aso ma lea aso. E ia te au le ava ma le faaaloalo e fia momoli atu ai le agaga faafeteai ma le agaga faamalo i le paia maualuga o le Maota i o outou tulaga faalupe ma tulaga tetele. Malo saunoa, malo mo le faaaliga o outou finagalo, o lea ua faafogofoga le Maota faapea foi le tapuaiga a si o tatou atunuu. O taga lava a le Maota e faapena ona uiga, o felafolafoaiga, e sua le aulapauta, sua le aulapatai, ae matua lava i le oo. O le mea la lea, o le mea la lea o le a foi sa outou faafogofoga i le taitaiga a le Nofoa i lenei aso, ia e faapena, e matua atu i ina, o le galuega e tua atu le Nofoa i le paia maualuga o le Maota.

Ia ona afe foi lea o se faamatalaga e momoli le faamalo ma le faafetai i le tapuaiga a Samoa o faafogafoga mai i maota ma laoa taitasi, malo le tapuai mai, ua tau i manu ma ua iu manuia le fonotaga a lau Palestine ona o la outou tapuaiga mamalu. Faamanua le Atua, malo le tapuai, malo foi le tauatai. Ae e le i tolopo galuega a le Maota i lenei aso, ou te tapa ma le

faaaloalo le sui usufono mo Faasaleleaga Nu.4 e faaiuina le tatou Fonotaga i se tatalo.

*Na tolopo Galuega a le Fono Aoao Faitulafono i le itula e 1:07 i le afiafi
seia aulia le itula e 9:00 i le taeao o le Aso Faraile, 26 Iuni 2020.*